

溫

熱

經

緯

溫熱經緯序

自來生民之疾。莫重於傷寒。存亡判乎呼吸。得失決於一朝。變化萬端。不容或紊。而傷寒中。溫熱暑溼之病。證因非一。尤易混淆。前賢所以各有專書。互相闡發。而斤斤於此也。顧明於此者。昧於彼。聚訟紛紜。各鳴已得。徒使好學之士。無所適從。而或過信一家之言。未免偏之爲害矣。王君孟英。該博淹貫。引經斥異。衆美兼收。謂前人之說。旣已中肯。何必再申已意。因而棄瑕錄瑜。彙成溫熱經緯一編。蓋本述而不作之意。而其中間以按語。亦謂旁考他書。參以閱歷。則亦猶之述耳。而初非有私心臆斷於其間也。僕惜

不知醫。過從之餘。竊聞緒論。喜長沙之學。旣得諸家表彰於前。復得王氏釐訂於後。由是千秋絕業。不致淆亂於羣言。而四時五氣之感。亦不致難辨。而失之歧誤。其有裨生民之命。豈淺鮮哉。屬爲弁言。爰不揣譎陋而書之。

咸豐二年壬子初夏。仁和趙夢齡。

溫熱經緯序

余讀孟英之霍亂論也。在道光紀元之二十有八年。閱三載。孟英遊江右。時余握篆宜黃。始納交於孟英。因得讀其回春錄。仁術志。諸治案。爲之編纂排比。付諸剞劂。以惠世人。孟英知余耽情竹素。積嗜成癖。所獲奇方。祕籍。恆郵寄相示。拓我見聞。而余每有所疑。馳書相問難。孟英爲之條分縷析。援古證今。如冰斯開。如結斯解。披函莊誦。未嘗不撫案稱快。數載以來。尺書往復。魚鴈爲勞。夫疾疢人之所時有也。不有藥石。患害曷瘳。然而醫籍流傳。途徑多歧。聚訟紛紜。各鳴一得。使後學旁皇眩惑。罔決適從。識者病之。

余恆欲廣搜百氏兼綜羣言。吸攝精華。傾吐糟粕。勒爲一書。以質好學深思之士。而才識謏陋。不敢自信。欲俟資力稍充。邀孟英共事揚權。成斯盛舉。浮沈數載。而所志迄莫能償。旣而軍事興。粵西賊起。攻長沙。屠武昌。陷安慶。遂踞金陵。江西左皖右楚。以大江爲門戶。大憲議保甲。議團練。以固疆圉。時余自宜黃改任臨川。雖地居腹裏。而民氣素浮。訛言繁興。張皇旣虞生事。優柔又恐養奸。昕夕鹿鹿簿書間。而此事遂不暇計及。未幾先君子在籍棄養。奔喪歸里。干戈載途。道路梗澀。乃取道長沙。泛洞庭。涉江漢。當武昌之南。溯流而西。至樊城。棄舟登車。攬許昌之遺蹟。登大

梁之故墟。慨然發懷古之思。及渡河。則桑梓在望。故里非遙。將涉滹沱。猝與賊遇。遽折而東。旅寓於豐甯之間。蓋紆迴六千里。馳驅五閱月。而迄未得歸也。甲寅秋。烽煙稍靖。始得展祖宗之邱墓。安先君子於窀穸。十年遊子。重返敝廬。閭里故人。半歸零落。追念疇昔。喟然興歎。居數月。復以公事牽率。買舟南下。因得謁孟英於武林。握手言歡。厯敘契闊。而孟英業益精。學益邃。涵養深醇。粹然見於面目。余以行迫。未得深談。惘惘而別。已而孟英來答拜。輿夫負巨簾。置舟中。則孟英所贈書也。舟行正苦岑寂。得此奇編。如親良友。遂次第讀之。中得一編。題曰潛齋叢書。急閱之。蓋

孟英數年。所搜輯言醫之書也。或表著前微。或獨攄心得。或採摭奇方。如肘後。或區別品彙。如圖經。匡坐篷窗間。迴環雒誦。奇情妙緒。層見疊出。滿紙靈光。與嚴陵山色。競秀爭奇。噫。技至此乎。夫士君子。能成不朽之盛業。而爲斯民所託命者。其精神必強固。其志慮必專壹。其學問必博洽。其蘊蓄必深厚。而天又必假以寬閒之歲月。以成其志。孟英懷才抱奇。隱居不仕。而肆力於醫。故所造如此。豈偶然哉。余行抵玉山。遇賊。不能前。仍返武林。就孟英居焉。晨夕過從。相得甚歡。因并讀其溫熱經緯。經緯者。蓋以軒岐仲景爲經。葉薛諸家爲緯。體例一仍霍亂論之舊。而理益粹。

論益詳。其言則前人之言也。而其意則非前人所及也。余於此事懷之數年。莫能措手。孟英已奮筆而成此書。洋洋灑灑。數十萬言。無一支字蔓語。屬雜其間。是何才之奇。而識之精耶。異日由此例而推之。各雜證。力闢榛蕪。獨開異境。爲斯道集大成。洵千秋快事哉。余於孟英之學。無能望其項背。而孟英謬引爲知己。殆所謂形骸之外。別有神契者耶。因備述顛末於簡端。以誌交誼之雅云。

咸豐五年歲次乙卯。端陽前三日。定州楊照藜敘。

溫熱一證。庸手妄爲治療。天札多矣。夢隱憫之。而作此書。俾學者得所遵循。生平著述等身。當以此書稱首。眞寶書也。其友烏程汪曰楨。讀而善之。因爲之贊曰。

活人妙術。司命良箴。不偏不易。宜古宜今。千狐之裘。百衲之琴。軒岐可作。其鑑此心。

同治二年癸亥二月朔。書於上海旅次。

自序

內經云。天有四時五行。以生長收藏。以生寒暑燥溼風。夫此五氣。原以化生萬物。而人或感之爲病者。非天氣有偶偏。卽人氣有未和也。難經云。傷寒有五。有中風。有傷寒。有溼溫。有熱病。有溫病。此五氣感人。古人皆謂之傷寒。故仲聖著論。亦以傷寒統之。而條分中風。傷寒。溫病。溼。喝。五者之證治。與內經難經。淵源一轍。法雖未盡。名已備焉。陰符經云。天有五賊。見之者昌。後賢不見。遂至議論愈多。至理愈晦。或以傷寒爲溫熱。或以溫熱爲傷寒。或併疫於風溫。或併風溫於疫。或不知有伏氣爲病。或不知有外感之溫。

甚至併暑暍二字而不識。良可慨已。我曾王父隨筆中。首爲剖論。茲雄不揣愚昧。以軒岐仲景之文爲經。葉薛諸家之辯爲緯。纂爲溫熱經緯五卷。其中注釋。擇昔賢之善者而從之。間附管窺。必加雄案二字以別之。俾讀者。先將溫暑溼熱諸病名。了然於胸中。然後博覽羣書。庶不爲其所眩惑。而知所取舍矣。非敢妄逞意見。欲蓋前賢。用質通方。毋嗤荒陋。

咸豐二年。壬子。春二月。海甯王士雄。書於潛齋。

溫熱經緯目錄

海甯王士雄孟英纂

卷一

內經伏氣溫熱篇

卷二

仲景伏氣溫病篇

仲景伏氣熱病篇

仲景外感熱病篇

仲景溼溫篇

仲景疫病篇

卷三

葉香巖外感溫熱篇

葉香巖三時伏氣外感篇

卷四

陳平伯外感溫病篇

薛生白溼熱病篇

余師愚疫病篇

卷五

方論

溫熱經緯卷一

海甯王士雄孟英纂

定州楊照黎素園

評

烏程汪曰楨謝城

仁和沈宗淦辛甫參

內經伏氣溫熱篇

素問生氣通天論曰冬傷于寒春必溫病

張仲景曰冬時嚴寒萬類深藏君子固密則不傷于寒

雄按傷而卽病者爲傷寒不卽病者爲溫熱

章虛谷曰冬寒伏於少陰鬱而化熱乘春陽上升而外

發者。爲實證。

金匱真言論曰。夫精者。身之本也。故藏于精者。春不病溫。王啟元曰。精氣伏藏。則陽不妄升。故春無溫病。

尤淵吾曰。冬傷于寒者。春月溫病之由。而冬不藏精者。又冬時受寒之源也。

吳鞠通曰。不藏精。非專主房勞說。一切人事之能動搖其精者。皆是。卽冬時天氣應寒。而陽不潛藏。如春日之發泄。甚至桃李反花之類。亦是也。

章虛谷曰。經論溫病。有內伏而發外者。有外感隨時而成者。其由內伏發外者。又有虛實二證。上條爲實證。此

條爲虛證也。

熱論篇曰。凡病傷寒。而成溫者。先夏至日者。爲病溫。後夏至日者。爲病暑。暑。當與汗出勿止。

王啟元曰。此以熱之微甚爲義也。陽熱未盛。故曰溫。陽熱大盛。故曰暑。

楊上善曰。冬傷于寒。輕者。夏至以前發。爲溫病。重者。夏至以後發。爲暑病。

林觀子曰。少陰真氣旣虧。邪必深入。鬱久化熱。自內而出。傷寒序例云。暑病者。熱極重于溫。是暑病者。其實熱病也。

沈堯封曰。傷寒有五。熱病乃其一耳。餘論俱散失矣。
章虛谷曰。此言凡病傷寒。則不獨指冬時之寒也。蓋寒
邪化熱。隨時皆有也。

雄按。脈要精微論曰。彼春之暖。爲夏之暑。夫暖卽溫也。
熱之漸也。然夏未至。則不熱。故病發猶曰溫。其首先犯
肺者。乃外感溫邪。若夏至後。則漸熱。故病發名曰暑。蓋
六月節。曰小暑。六月中。曰大暑。與冬至後之小寒大寒
相對待。是病暑卽病熱也。乃仲聖以夏月外感熱病。名
曰喝者。別於伏氣之熱病而言也。說文云。喝。傷暑也。漢
書。武帝紀云。夏大旱。民多喝死。故暑也。熱也。喝也。皆夏

令一氣之名也。後人不察。妄騰口說。甚至講太極。推先天。非不辯也。其實與病情無涉。而於醫理。反混淆也。淦按。此言其常也。然春時亦有熱病。夏日亦有溫病。溫熱之輕者也。熱溫之重者也。故古人。往往互稱。

刺熱篇曰。肝熱病者。小便先黃。腹痛多臥。身熱。熱爭則狂言及驚。脇滿痛。手足躁。不得安臥。庚辛甚。甲乙大汗。氣逆則庚辛日死。刺足厥陰。少陽其逆。則頭痛員員。脈引衝頭也。

吳鞠通曰。肝病。小便先黃者。肝脈絡陰器。又肝主疎洩。肝病。則失其疎洩之職。故小便先黃也。腹痛多臥。木病

尅脾土也。熱爭邪熱盛而與正氣相爭也。狂言及驚。手厥陰心包病也。兩厥陰同氣。熱爭則手厥陰亦病也。脇滿痛。肝脈行身之兩旁。脇其要路也。手足躁不得安臥。肝主風。風淫四末。又木病尅土。脾主四肢。木病熱必吸少陰腎中真陰。陰傷故騷擾不得安臥也。庚辛金日尅木。故甚。甲乙肝木旺時。故汗出而愈。氣逆謂病重而不順其可愈之理。故逢其不勝之日而死也。厥陰少陽並刺者。病在臟兼瀉其腑也。逆則頭痛。以下肝主升。病極而上升之故。自庚辛日甚以下之理。餘臟仿此。

心熱病者。先不樂。數日乃熱。熱爭則卒心痛。煩悶。善嘔。頭

痛面赤無汗。壬癸甚。丙丁大汗。氣逆則壬癸死。刺手少陰太陽。

吳鞠通曰。心病先不樂者。心包名膻中。居心下。代君用事。經謂膻中爲臣使之官。喜樂出焉。心病故不樂也。卒心痛。凡實痛。皆邪正相爭。熱爭。故卒然心痛也。煩悶。心主火。故煩。膻中氣不舒。故悶。嘔。肝病也。木火同氣。熱甚。而肝病亦見也。且邪居膈上。多善嘔也。頭痛。火升也。面赤。火色也。無汗。汗爲心液。熱閉液乾。汗不得通也。

章虛谷曰。人身生陽之氣。根於腎臟。始發於肝木。木生火。火生土。土生金。金生水。水又生木。如是生生不息。則

安和無患也。邪伏血氣之中。必隨生陽之氣而動。動甚則病發。然其發也。隨氣所注。而無定處。故難經言。溫病之脈。行在諸經。不知何經之動也。如仲景所論。或發於陰經。或發於陽經。正合難經之言也。今內經按生氣之序。首列肝。次以心脾肺腎。以明邪隨生氣而動。其於不定之中。自有一定之理。足以印證難經仲景之言。而軒岐越人仲景之一脈相承。更可見矣。

脾熱病者。先頭重。頰痛。煩心。顏青。欲嘔。身熱。熱爭則腰痛。不可用俯仰。腹滿泄。而頷痛。甲乙甚。戊巳大汗。氣逆則甲乙死。刺足太陰陽明。

吳鞠通曰。脾病頭先重者。脾屬溼土。性重。經謂溼之中人也。首如裹。故脾病頭先重也。頰。少陽部也。土之與木。此負則彼勝。土病而木病亦見也。煩心。脾脈注心也。顏青欲嘔。亦木病也。腰痛不可用俯仰。脾病則胃不能獨治。陽明主約束。而利機關。故痛而至於不可俯仰也。腹滿泄。脾經本病。領痛亦木病也。

肺熱病者。先淅然厥。起毫毛。惡風寒。舌上黃。身熱。熱爭則喘欬。痛走胸膈背。不得太息。頭痛不堪。汗出而寒。丙丁甚。庚辛大汗。氣逆則丙丁死。刺手太陰陽明。出血如大豆。立已。

吳鞠通曰。肺病先惡風寒者。肺主氣。又主皮毛。肺病則氣膹鬱。不得扞衛皮毛也。舌上黃者。肺氣不化。則溼熱聚。而爲黃苔也。章虛谷曰。若外邪初感。而非內熱。其苔必白。喘。氣鬱極也。欬。火尅金也。胸膈背之腑也。皆天氣主之。肺主天氣。肺氣鬱極。故痛也。走者。不定之詞。不得太息。熱閉肺臟也。頭痛不堪。亦天氣膹鬱。熱不得泄。直上衝腦也。鬱熱而腠開汗出。其熱暫泄。則寒也。畧參章氏

腎熱病者。先腰痛。肝痿苦渴。數飲。身熱熱爭。則項痛而強。肝寒且痠。足下熱。不欲言。其逆。則項痛。員員澹澹然。戊己甚。壬癸大汗。氣逆則戊己死。刺足少陰太陽。

吳鞠通曰。腎病腰先痛者。腰爲腎之腑。又腎脈貫脊。會於督之長強穴。肝腎脈入跟中。以上膈內。太陽之脈。亦下貫膈。內膈。卽肝也。瘦熱鑠液也。苦渴數飲。腎主五液而惡燥。病熱。則液傷而燥。故苦渴而飲水求救也。項太陽之脈。從顛入絡腦。還出別項下。腎病至於熱爭。臟病甚而移之腑。故項痛而強也。肝寒熱極爲寒也。足下熱。腎脈從小指之下。衰趨足心涌泉穴。病甚而熱也。不欲言。有無可奈何之苦也。邪氣上逆。則項更痛。員員澹澹。一身不能自主。難以形狀之病也。

畧參章氏

肝熱病者。左頰先赤。心熱病者。顏先赤。脾熱病者。鼻先赤。

肺熱病者。右頰先赤。腎熱病者。頤先赤。病雖未發。見赤色者。刺之。名曰治未病。

章虛谷曰。此更詳五臟熱邪未發。而必先見於色之可辨也。左頰。顏。鼻。右頰。頤。是肝。心。脾。肺。腎。臟之氣。應於面之部位也。病雖未發。其色先見。可見邪本伏於氣血之中。隨氣血流行而不覺。更可印證難經所云。溫病之脈。行在諸經。不知何經之動也。故其發也。必隨生氣而動。而先見色於面。良工望而知其邪動之處。乘其始動。卽刺而洩之。使邪勢殺。而病自輕。卽難經所云。隨其經之所在。而取之者。是爲上工。治未病也。用藥之法。亦可類

推矣。

治諸熱病。以飲之寒水。乃刺之。必寒衣之。居此寒處。身寒而止。

章虛谷曰。以其久伏之邪。熱從內發。故治之。必先飲寒水。從裏逐熱。然後刺之。從外而泄。再衣以寒。居處以寒。身寒熱除。而後止。

雄按。今人不讀內經。雖溫熱暑疫諸病。一概治同傷寒。禁其涼飲。厚其衣被。閉其戶牖。因而致殆者。我見實多。然飲冷。亦須有節。過度。則有停飲。腫滿。嘔利。等患。更有愈後。手指足縫出水。速投米仁三兩。茯苓三兩。白朮一

兩車前。五兩桂心。一錢名驅溼保脫湯。連服十劑。可免
腳趾脫落。此卽諺所謂脫腳傷寒也。亦不可不知。若飲
冷雖多。而汗出亦多。必無後患。

太陽之脈。色榮顴骨。熱病也。榮未交曰。今且得汗。待時而
已。與厥陰脈爭見者。死期不過三日。其熱病內連腎。

章虛谷曰。此明外感與伏邪互病之證也。與熱論篇之
兩感同中有異。彼則內外同時受邪。內外俱病。故不免
於死。此則外感先發。伏邪後發者。可生。若同發。則死期
不過三日也。云太陽之脈者。邪受太陽經脈。卽一日巨
陽受之。頭項痛。腰脊強者。是也。色榮顴骨者。鮮榮色赤。

見於顴骨也。蓋顴者。骨之本。骨者。腎所生。腎臟伏熱之邪已動。循榮血見色於顴也。榮未交。今且得汗。待時而已者。言太陽經脈外受之邪。與榮血中伏熱之邪。尙未相交。今且使其得汗。先解外邪。所謂未滿三日。可汗之是也。其內伏之邪後發。待臟氣旺時可已。如腎熱病。待壬癸日。得大汗而已也。又如所云。見赤色者。刺之名。治未病。亦可也。倘與厥陰經脈病證爭見。則腎肝皆有邪熱內發。其勢必與太陽外邪連合而不可解。故比之兩感。死期更速。不過三日也。蓋兩感病起於經。必待胃氣盡。六日方死。此則其熱病內連腎臟。本元卽絕。故死速。

也。

少陽之脈。色榮頰前。熱病也。榮未交。曰。今且得汗。待時而已。與少陰脈爭見者。死期不過三日。

章虛谷曰。上言肝熱病者。左頰先赤。肝爲厥陰。膽爲少陽。相表裏者也。外邪受於少陽經脈。而肝臟伏熱之色。榮於頰前。若外內之邪。尙未相交。今且使其得汗以解外。其內發之熱。可待臟氣旺時而已。若與少陰經脈。病證爭見。則肝連腎熱。而內外邪勢。必交合難解。死期不過三日也。大抵外內之邪。發有先後。而不交合。尙可解救。故要緊。在榮未交一句。下文病名陰陽交。亦卽榮已

交之義也。經文止舉太陽少陽兩證。不及陽明太陰合病者。余竊度之。以陽明之腑。可用攻瀉之法。不至必死。非同太陽少陽厥陰。其邪連合。而無出路。則必死也。評熱病篇。帝曰。有病溫者。汗出輒復熱。而脈躁疾。不爲汗衰。狂言。不能食。病名爲何。岐伯曰。名陰陽交。交者死也。葉香巖曰。交者。陰液外泄。陽邪內陷也。

尤拙吾曰。交非交通之謂。乃錯亂之謂也。陰陽錯亂。而不可復理。攻其陰。則陽扞之不得入。攻其陽。則陰持之不得通。故曰。交者死也。郭氏謂。卽是兩感病。然兩感。是陰陽齊病。而非陰陽交病也。

章虛谷曰。陰陽之氣。本來相交而相生者。今因邪勢彌漫。外感陽分之邪。與內發陰分之邪。交合爲一。而本元正氣絕矣。故病名陰陽交。交者死。非陰陽正氣之相交也。下文明其所以然之理。

人之所以汗出者。皆生於穀。穀生於精。今邪氣交爭於骨肉。而得汗者。是邪卻而精勝也。精勝則當能食。而不復熱。復熱者。邪氣也。汗出者。精氣也。今汗出而輒復熱。是邪勝也。不能食者。精無俾也。病而留者。其壽可立而傾也。且夫熱論曰。汗出而脈尙躁盛者死。今脈不與汗相應。此不勝其病也。其死明矣。狂言者。是失志。失志者死。今見三死。不

見一生雖愈必死也。

章虛谷曰。汗生於穀。穀生於精者。謂由本元精氣化水穀以生津液。發而爲汗。邪隨汗泄。則邪卻而精勝也。精氣勝。則當能食。以化水穀。其邪已泄。則不復熱矣。乃復熱者。邪氣未去也。其所出之汗。精氣徒泄也。故汗出而輒復熱。是精卻而邪勝也。所以不能食。精無俾也。俾者。倚藉之謂。其病雖留連。其壽可立待而傾也。古論云。汗出而脈躁盛者死。正謂其精卻而邪不去也。若邪去而精氣存。脈必靜矣。今脈與汗不相應。則精氣不勝邪氣也。其死明矣。且狂言。是失志。失志者死。一也。汗出復熱。

精卻邪勝二也。汗與脈不相應三也。今見三死證。不見一生證。雖似愈。必死也。

雄按。溫證誤作傷寒治。而妄發其汗。多有此候。

汪按。此條爲溫證。不可妄表之訓。夢隱一語。可謂要言不煩。蓋溫病誤表。縱不成死候。亦必不易愈矣。麻黃桂枝人猶膽餒。最誤人者。陶節庵之柴葛解肌湯也。

陽明脈解篇曰。足陽明之脈病。惡人與火。聞木音。則惕然而驚。鐘鼓不爲動。聞木音而驚。何也。岐伯曰。陽明者。胃脈也。胃者。土也。故聞木音而驚者。土惡木也。帝曰。其惡火何也。岐伯曰。陽明主肉。其脈血氣盛。邪客之則熱。熱甚則惡

火。帝曰。其惡人何也。岐伯曰。陽明厥則喘。而惋。惋則惡人。
章虛谷曰。土被邪困。更畏木克。故聞木音而驚也。鐘鼓
之音屬金。土故不爲動也。熱甚故惡火。仲景所云。不惡
寒。反惡熱也。邪結而氣厥逆則喘。而惋。惋者。懊懣。故惡
人也。

帝曰。或喘而死者。或喘而生者。何也。岐伯曰。厥逆連臍。則
死。連經則生。

章虛谷曰。邪結在臍。則氣阻而喘。不能循經。達於四肢。
而又厥逆。蓋四肢稟氣於脾胃也。邪內入則連臍。故死。
外出則連經。故生。

帝曰。病甚。則棄衣而走。登高而歌。或至不食數日。踰垣上屋。所上之處。皆非其素所能也。而反能者。何也。岐伯曰。四肢者。諸陽之本也。陽盛。則四肢實。實則能登高也。帝曰。其棄衣而走者。何也。岐伯曰。熱盛於身。故棄衣欲走也。帝曰。其妄言罵詈。不避親疏。而不欲食。不欲食。故妄走也。

章虛谷曰。四肢稟氣於脾胃。胃爲臟腑之海。而陽明行氣於三陽。故四肢爲諸陽之本也。邪盛於胃。氣實於四肢。則能登高也。熱盛於身。故棄衣欲走。邪亂神明。怒氣衝動。故妄言罵詈。胃中邪實。不欲飲食。四肢多力。則妄走也。是大承氣湯之證。其邪連經。脈必滑大。下之可生。

其邪連臟脈必沈細。仲景云。陽病見陰脈者死。則雖有下證不可用下法矣。

雄按。溫證誤投熱藥補劑。亦有此候。經證亦有可用白虎湯者。沈細之脈亦有因熱邪閉塞使然。形證實者。下之可生。未可概以陰脈見而斷其必死。凡熱邪壅遏脈多細。裏遲澀。按證清解。自形滑數。不比內傷病服涼藥而脈加數者爲虛也。

汪按。大承氣證。仲聖謂脈弦者生。澀者死。洄溪則云。弦則尙有可生之機。未必盡生。澀則斷無不死者也。余所見滑大者。固下之不必顧忌。亦有弦而兼澀。下之而愈。

者。若大汗淋漓者。可用白虎也。

生氣通天論曰。因於暑。汗煩則喘喝。靜則多言。

吳鞠通曰。暑爲火邪。與心同氣。心受邪迫。汗出而煩。煩從

火從頁。謂心氣不喘喝者。火尅金故喘。遏鬱胸中。清廓安而面若火鑠也。

之氣。故欲喝而伸之。其或邪不外張。而內藏於心。則靜。

心主言。暑邪在心。雖靜。亦欲自言不休也。暑參拙意

刺志論曰。氣盛身寒。得之傷寒。氣虛身熱。得之傷暑。

林觀子曰。雖云身寒。實指身發熱言也。要以意得之。雄按

雖發熱而仍惡寒。不似傷暑之惡熱。故曰身寒。

吳鞠通曰。此傷寒暑之辨也。經語分明如此。奈何世人。

悉以治寒法。治溫暑哉。

雄按。不但寒傷形。暑傷氣。截然分明。而寒爲陰邪。

雖有紅腫

煩悶。羔酒狐裘。而患火病者。不暑爲陽邪。

雖有襲涼飲冷。夾雜陰寒。

可謂寒是陽邪。寒必兼火也。之證。亦人事之兼傷。

亦如水火之不相射。經云。天寒地

非天氣之本然也。

凍。天暑地熱。又云。陰陽之升降。寒暑彰其兆。理極明顯。

奈後賢。道在邇。而求諸遠。遂不覺其立言之失。而用藥之非也。

淦按。云得之者。推原受病之始。分清證因也。傷寒傷暑。爲內經兩大綱。是從對待說。若春傷於風。夏生飧泄云云。則從四序說。喻氏於內經中。又補傷燥。可見諸氣感

人皆能爲病。先聖後賢論極昭析。何今人治感。不論何證。但以傷寒藥治之。而不知有溫暑燥溼之病。陋矣。

熱論篇。帝曰。熱病已愈。時有所遺者。何也。岐伯曰。諸病遺者。熱甚。而強食之。故有所遺也。若此者。皆病已衰。而熱有所藏。因其穀氣相薄。兩熱相合。故有所遺也。帝曰。治遺奈何。岐伯曰。視其虛實。調其逆從。可使必已也。帝曰。病熱常何禁之。岐伯曰。病熱少愈。食肉則復。多食則遺。此其禁也。葉香巖曰。因食復。勞復。女勞復。而發汗。必致亡陽而死。章虛谷曰。此言病初愈。餘熱留藏於經絡血氣中。而未淨。因食助氣。則兩熱相合。而復熾。故食肉。病必復發。多

食穀則邪遺留。必淹纏難愈。故當戒口。清淡稀粥。漸爲調養也。

論疾診尺篇曰。尺膚熱甚。脈盛躁者。病溫也。其脈盛而滑者。病且出也。

吳鞠通曰。經之辨溫病。分明如是。何世人悉謂傷寒。而悉以傷寒。足三陰經。溫法治之哉。張會卿作類經。割裂經文。蒙混成章。由未細心紬繹也。尺膚熱甚。火鑠精也。脈盛躁。精被火煎沸也。脈盛而滑。邪機向外也。此節以下。診溫病之法。

平人氣象論曰。人一呼。脈三動。一吸。脈三動。而躁。尺熱曰

病溫。尺不熱。脈滑。曰病風。脈澀。曰痺。

吳鞠通曰。呼吸俱三動。是六七至脈矣。而氣象又急躁。若尺部肌膚熱。則爲病溫。蓋溫病必傷金水二臟之津液。尺之脈屬腎。尺之穴屬肺也。此處肌肉熱。故知爲病溫。其不熱。而脈兼滑者。則爲病風。風之傷人也。陽先受之。尺爲陰。故不熱也。如脈動躁。而兼澀。是氣有餘。而血不足。病則爲痺矣。

玉版論要曰。病溫。虛甚。死。

吳鞠通曰。病溫之人。精血虛甚。則無陰以勝溫熱。故死。熱病篇曰。熱病三日。而氣口靜。人迎躁者。取之諸陽。五十

九刺以瀉其熱。而出其汗。實其陰。以補其不足者。

吳鞠通曰。人迎躁。邪在上焦。故取之諸陽。以泄其陽邪。陽氣通。則汗隨之。實其陰。以補其不足者。陽盛則陰衰。瀉陽則陰得安其位。故曰。實其陰。瀉陽之有餘。卽所以補陰之不足。故曰。補其不足也。雄按。用藥之道。亦如此。

又曰。實其陰。以補其不足。此一句。實治溫熱之喫緊大綱。蓋熱病。未有不耗陰者。其耗之未盡。則生。盡則陽無留戀。必脫而死也。真能體味斯言。思過半矣。雄按。耗之未盡者。尙

有一縷之生機。可望若耗盡而陰竭。如旱苗之根已枯矣。沛然下雨。亦曷濟耶。

汪按。葉氏必以保津液爲要。細考經文此條。可知其理。

奈何恣用升提溫燥重傷其津耶。

身熱甚。陰陽皆靜者。勿刺也。其可刺者。急取之。不汗出則泄。所謂勿刺者。有死徵也。

吳鞠通曰。陽證陰脈。故曰勿刺。

熱病。七日。八日。動喘而弦者。急刺之。汗且自出。淺刺手大指間。

吳鞠通曰。喘爲肺氣實。弦爲風火鼓蕩。故淺刺手大指間。以泄肺熱。肺之熱痺開。則汗出。大指間。肺之少商穴也。

熱病。七日。八日。脈微小。病者溲血。口中乾。一日半而死。脈

代者。一日死。

吳鞠通曰。邪氣深入下焦。逼血從小便出。故溲血。腎精告竭。陰液不得上潮。故口中乾。脈至微小。不惟陰精竭。陽氣亦從而竭矣。死象自明。倘脈實者。可治。

熱病。已得汗出。而脈尙躁。喘且復熱。勿刺膚。喘甚者死。

吳鞠通曰。熱不爲汗衰。金受火尅。喘而化源欲絕。故死。然間有可治者。

熱病。不知所痛。耳聾。不能自收。口乾。陽熱甚。陰頗有寒者。熱在骨髓。死不可治。

吳鞠通曰。不知所痛。正衰不與邪爭也。耳聾。陰傷。精欲

脫也。不能自收。正氣僊也。口乾熱甚。陽邪獨盛也。陰頗有寒。熱邪深入陰分。外雖似寒。而熱在骨髓也。故曰死。不治。其有陰精未至涸竭者。間可微幸得生。畧參拙意

熱病已得汗。而脈尚躁盛。此陰脈之極也。死。其得汗。而脈靜者。生。

吳鞠通曰。汗後脈躁。陰虛之極。故曰死。然雖不可刺。能以甘涼藥沃之。得法。亦有得生者。

熱病者。脈尚躁盛。而不得汗者。此陽脈之極也。死。脈盛躁。得汗靜者。生。

吳鞠通曰。脈躁無汗。陽盛之極。陽盛而至於極。陰無容

留之地。故亦曰死。雖然。較前陰陽俱靜有差。此證猶可。大劑急急救陰。亦有活者。卽已得汗。而陽脈躁甚。邪強正弱。正尙能與邪爭。若留得一分津液。便有一分生理。貴在留之得法耳。至陰陽俱靜。邪氣深入下焦陰分。正無扞邪之意。直聽邪之所爲。不死何待。

熱病不可刺者。有九。一曰汗不出。大顙發赤。楊按陰虛勞損兩顙必赤可與此比噦者死。類而觀

雄按汗不出。大顙赤。似屬陽盛。噦者。呃忒也。肺胃之氣不降。楊按此是實證必則呃呃而上逆也。治以輕清肅化之劑。病似可瘳。何以經文。卽斷爲不可刺之死侯。殆

謂熱邪方熾而腎陽欲匱。陽已無根。病深聲噦之證歟。
楊按大顙屬腎發赤是伏救之陽上脫也。加以噦則證與色合頃刻而脫故不治。則其噦必自
下焦而升。病由冬不藏精所致。更察其脈亦必與上焦
陽盛之病有別也。

二曰泄而腹滿甚者死。

雄按腹滿者當泄之。既泄而滿甚。是邪尙踞而陰下脫。
猶之乎。熱不爲汗衰也。故死。又陳遠公云。喘滿直視。謔
語下利。一齊同見者不治。若有一證未見者。或可望生。
宜用人參。麥冬。白芍。各一兩。石膏。五錢。竹茹。三錢。名挽
脫湯。欲脫未脫時。亟服之。庶幾可挽。

三曰。目不明。熱不已者。死。

吳鞠通曰。目不明。精散而氣脫也。經曰。精散視歧。又曰。氣脫者。目不明。熱猶未已。仍鑠其精。而傷其氣。不死得乎。

汪按。此目不明。乃難經所謂。脫陰者。目盲也。陰竭而熱。猶不已。安得不死。

四曰。老人。嬰兒。熱而腹滿者。死。

雄按。腹滿者。宜泄之。老人。嬰兒。不任大泄。既不任泄。熱無出路。老弱陰液不充之體。涸可立待。故曰死。

五曰。汗不出。嘔下血者。死。

雄按。汗不出。熱內逼。上干清道。以爲嘔。迫鑠於營而下。血陰液兩奪。是爲死徵。

六曰。舌爛。熱不已者。死。

吳鞠通曰。陽邪深入。則一陰一陽之火。結於血分。腎水不得上濟。故舌本爛。熱退猶可生。熱仍不止。故曰死也。汪按。此舌爛。乃由腎中虛陽。故斷爲死候。與肺胃熱熾。大熱。口舌糜腐者。大異。

七曰。欬而衄。汗不出。出不至足者。死。

吳鞠通曰。欬而衄。邪閉肺絡。上行清道。汗出邪泄可生。不然。則化源絕矣。

雄按。汗出不至足者。肺氣不能下及。亦是化源欲絕之徵也。

八曰。髓熱者死。九曰。熱而瘛者死。腰折。瘕瘕。齒噤。齧也。

吳鞠通曰。髓熱者。邪入至深。至於腎部也。熱而瘛。邪入至深。至於肝部也。○此節歷敘熱病之死徵。以禁人之刺。爲刺則必死也。然刺固不可。亦有可藥而愈者。蓋刺法能泄。能通。開熱邪之閉結最速。至於益陰以存津。楊

二語乃治溫要領

實刺法之所短。而湯藥之所長也。

汪按。統觀死候九條。大抵由於陰竭者爲多。吳氏語破的。

溫熱經緯卷一

溫熱經緯卷二

海甯王士雄孟英纂

定州楊照藜素園

評

烏程汪曰楨謝城

錢塘顧俊聽泉參

仲景伏氣溫病篇

傷寒論師曰伏氣之病以意候之。今月之內欲有伏氣。假令舊有伏氣。當須脈之。若脈微弱者。當候中痛。似傷。非喉痺也。病人云實咽中痛。雖爾。今復欲下利。

張路玉曰。冬月感寒。伏藏於經。至春當發。故曰以意候

之。今月之內。言春分候也。若脈微弱者。其人真元素虧。必不發於陽。而發於陰。以少陰之脈。循喉嚨。伏邪始發。熱必上升。故必喉中痛。似傷。腎司開闔。陰邪之熱邪。不能外發。勢必內攻。其後下利也。

章虛谷曰。此條仲景教人辨冬伏寒邪。春發之溫病。當以心意測候之也。如今月之內。欲有發伏氣之病者。必無其氣。而有其病。病與時氣不合。卽知其病。因舊有伏氣而發。假令舊有伏氣者。須審其脈。知其邪從何處而出也。若脈微弱。知其邪雖化熱。未離少陰。循經脈而上灼。當喉中痛。似傷者。卻非外邪入內之喉痺。是內熱欲

出之喉痛也。何也。若春時外感風邪。脈浮而弦數。先見發熱惡寒之外證。今脈微弱。則非外感。而反喉痛。則確知爲內發之伏熱。是無其氣而有其病也。伏熱上行。不得外散。勢必又從下走。故曰實咽中痛。雖爾。今復欲下利也。然亦有兼外感者。卽審其脈證。皆可照此辨之也。觀仲景標中風傷寒暑熱等病之脈。與難經同。惟難經言溫病之脈。行在諸經。不知何經之動也。各隨其經所在而取之。是言溫病初由伏邪。隨氣血流行在諸經中。及其邪之發也。不知從何經而動。旣發之後。各隨其邪所在之經而治之。其發無定處。故無一定之脈象可示。

也。今仲景又教人審脈以辨邪發之經。如脈微弱。卽知其邪未離少陰。必當有咽痛下利等證。正與難經互相發明者也。故如下文云。邪出三陽。熱勢大盛。其脈浮大。上關上。則是脈隨證變。證隨脈見。其發也。旣無定處。則無定證。旣無定證。則無定脈。故難經不標脈象也。由是觀之。其與外感之邪。而有定證定脈者。迥不同矣。故仲景與難經無異也。

少陰病。

脈微細。但欲寐也。

二三日。咽痛者。可與甘草湯。二不差者。

與桔梗湯。二

張路玉曰。陰邪爲病。其發必暴。所以伏氣發於少陰。必

咽痛。仲景遂以緩法治之。甘草味甘。其性最緩。因取以治少陰伏氣。發溫之最急者。蓋甘先入脾。脾緩則陰火之勢亦緩。且生用力能瀉火。故不兼別味。獨用以取專功也。設不差。必是伏邪。所發勢盛。緩不足以濟急。更加桔梗。升載其邪。使發於陽分之陰邪。盡從陽分而散。不致仍復下陷。入於陰分也。倘治稍失宜。陰津爲熱邪所耗。卽用祛熱救陰之藥。恐無及也。

葉香巖曰。春夏溫熱之病。必自內而及外。

汪按此專指伏氣之病。

尤拙吾曰。少陰爲陰。寒邪亦爲陰。以陰遇陰。故得藏而不發。是以傷寒之邪。自太陽遞入三陰。溫病之邪。自少

陰傳出三陽。

章虛谷曰。風寒外閉。少陰而咽痛者。仲景用半夏散。辛溫開泄之法矣。此少陰伏熱內發。循經上灼而咽痛。雖不合用辛溫開泄。亦不可用涼藥。以遏其外出之勢。故用甘草。甘草和中。導邪外達。如不差。更加桔梗。上通其氣。楊云。據此。則桔梗分兩宜輕。蓋火鬱不得外出。故痛。通其氣。使火外達。則痛自止矣。傷寒之邪。自表入裏。故先太陽。而後至少陰。溫病之邪。自裏出表。故先少陰。而後出太陽。歷來不辨源流。故各條次序亦紊。而傷寒溫病。攙混不清也。

淦按。伏氣爲病。皆自內而之外。不止春溫一病。蓋四時之氣。皆有伏久而發者。不可不知也。

少陰病。下利。咽痛。胸滿。心煩者。豬膚湯三主之。

張路玉曰。下利咽痛。胸滿心煩。少陰之伏邪。雖發。陰經實爲熱證。邪熱充斥。上下中間。無所不到。寒下之藥。不可用矣。又立豬膚湯。以潤少陰之燥。與用黑驢皮之意頗同。陽微者。用附子溫經。陰竭者。用豬膚潤燥。同具散邪之意。比而觀之。思過半矣。

少陰病。得之二三日以上。心中煩。不得臥。黃連阿膠湯四主之。

周禹載曰。伏邪未發。津液先已暗耗。今得之二三日。以上。雖陰火不升。未見咽痛等證。而心煩不得臥。已知陰液消耗。故以芩連祛熱。膠芍滋陰。兩得之矣。

少陰病。下利六七日。欬而嘔渴。心煩不得眠者。豬苓湯。

主之。

楊云。此當兼有停飲。故方治如此。

章虛谷曰。此不咽痛。其邪由肺。直走腸胃而下利。六七日不止。因而熱從下陷。不得外透。故逆於肺。則欬而嘔。乘心。則煩渴不得眠。以心肺皆通少陰之脈。故也。主以豬苓湯。利小便而滋陰。滋其陰。則熱隨利去。利其小便。則瀉止。而煩渴亦解矣。

少陰病得之二三日。口燥咽乾者。急下之。宜大承氣湯。張路玉曰。伏氣之發於少陰。其勢最急。與傷寒之傳經熱證不同。得病纔二三日。卽口燥咽乾。延至五六日。始下。必枯槁難爲矣。故宜急下。以救腎水之燔灼也。按少陰急下三證。一屬傳經熱邪亢極。一屬熱邪轉入胃腑。一屬溫熱發自少陰。皆刻不容緩之證。故當急救。欲絕之腎水。與陽明急下三法。同源異派。

章虛谷曰。上五條。皆邪不離少陰。其病之輕重變化。證之虛實不同。有如此者。況又傳於他經。而其變證。殆無窮盡。觀仲景隨證設方。辨別施治。其義理精微。有難言

喻矣。

太陽病發熱而渴。不惡寒者。爲溫病。

郭白雲曰。冬傷於寒。至春發爲溫病。冬不傷寒。而春自

感風溫之氣而病者。亦謂之溫。

雄按自感溫病仲聖未論詳於葉氏列第三卷

王安道曰。溫病如此。則知熱病亦如此。是則不渴而惡寒者。非溫熱病矣。溫熱病而有惡風惡寒之證者。重有風寒新中也。

周禹載曰。溫病由伏邪自內發出。一達於外。表裏俱熱。熱勢既壯。鬱邪耗液。故發而卽渴。其表本無邪鬱。內方喜寒。故不惡寒。延至二五日。間或腹滿。或下利者。卽此

證也。與傷寒之先表後裏者大異。然猶系太陽。以未顯他經之證。明自少陰發出。爲表裏也。

葉香巖曰。發熱而渴者。溫病。熱邪自內達外。若誤汗之。禍不可言。

沈堯封曰。此條雖不言脈。以後條參之。其尺部必浮也。章虛谷曰。溫病之發。而無定處。少陰之表。爲太陽熱邪從裏出表。卽有發熱頭痛之太陽病也。不惡寒。其非外感之邪可知。渴者。熱從內發之證也。仲景恐人錯認。爲太陽傷風寒。故特標是伏熱內發之溫病也。其少陰溫病。反不標者。因伏氣條內。已申明咽痛下利。爲少陰初

發之溫病也。

雄按。汪謝城。孝廉云。吳氏溫病條辨。上焦篇。首引傷寒論云。太陽病。但惡熱。不惡寒而渴者。名曰溫病。桂枝湯主之。今檢傷寒論。卻未見此數語。使此語。真出仲景耶。亦當辨其簡誤。若係吳氏誤記。尤不可不爲之辯正。余謂非誤記也。因喻氏嘗云。仲景治溫證。凡用表藥。皆以桂枝湯。以示微發於不發之意。尤在涇。讀書記云。此喻氏之臆說。非仲景之舊章。鞠通自問。跳出傷寒圈子。而不覺已入嘉言套中。又不甘爲人下。遂肆改原文。捏爲聖訓。以竊附於宮牆。而不自知其誣聖誤世之罪。亦可

慨已。

汪按。鞠通發憤著書。力闢升散溫燥之弊。功已不細。然可議處尙多。夢隱此書。去其瑕。而存其瑜。乃鞠通之諍友也。

若發汗已。身灼熱者。名曰風溫。風溫爲病。脈陰陽俱浮。自汗出。身重。多眠睡。鼻息必鼾。語言難出。若被下者。小便不利。直視失溲。若被火者。微發黃色。劇則如驚癇。時瘧。症若火熏之。一逆尙引日。再逆促命期。

張隱庵曰。名曰溫者。積寒成熱而發也。宜辛涼發散。楊

此語誤矣。非治此證之法。條內無太陽微汗出而解。若病三字。是無表邪也。何必辛涼發散。

誤用辛溫之藥。發汗已。身反灼然熱發者。名曰風溫。蓋發汗。則陰液外泄。風熱之邪更甚。而身如燒灼也。脈陰陽俱浮者。風熱之邪。自裏出表。故浮也。風熱傷氣。故汗出。而身重多眠也。楊云。此證最易出汗。故條中有自汗之文。不必以辛溫誤散而然也。肺氣通於鼻。而主皮毛。風熱在表。而睡息必鼾也。夫心主言。肺主聲。肺熱受傷。故語言難出。此因風熱過甚。而陰氣消沮。故爲病如是焉。若被妄下。則愈亡陰液於後。而小便不利於前矣。津液傷。則州都之官失守。不能約束而失溲矣。足太陽之脈入目系而出項。津液內亡。則目系不能轉。而直視矣。若加以火攻。風火交熾。脾土轉病。

身必發黃。火攻之甚劇。則神志散越。如驚。如癩。時瘕。時
癰矣。是以一逆。尚可苟延時日。如再以火熏之。是再逆
促命期矣。楊云。注家皆以此條承上文而來。故所注如
此。其實上條乃溫病提綱。此條並不與上條
連貫也。汗按。楊評極精。然病名風溫而脈浮。參以辛涼
未爲過也。自汗固不必由於誤表。然誤表致成此候者
亦有之。後文白虎加人
參湯。石膏亦辛甘之味。

沈堯封曰。溫熱二病。古人往往互稱。醫者祇須認定脈
證。擬何方治。不必拘於名式。難經云。熱病之脈。陰陽俱
浮。本條云。風溫爲病。脈陰陽俱浮。兩證脈相同也。三陽
合病。但欲眠睡。身重。難以轉側。本條身重多眠。兩證病
相似也。熱病合病。俱主以白虎湯。上則此條雖無主治。

似可從白虎湯擬法。

章虛谷曰。太陽外感之邪。若發汗已。必熱退身涼矣。今熱邪從少陰而發。既經外發。當清其熱。乃誤發其汗。反傷津氣。助其邪勢。故身更灼熱。因而勾起其肝風。鼓蕩其溫邪。故名曰風溫。其爲病也。虛陽外浮。熱邪漫溢。故脈陰陽俱浮。津液外泄。自汗不止。氣乏神昏。則身重多眠睡。內風上鼓。而機竅窒塞。故鼻息必鼾。語言難出。其非外受風邪之證。可見矣。若被下者。謂未經誤汗。非謂汗後又下也。蓋邪伏少陰。熱灼水枯。咽乾口燥。法當急下。此熱已發出太陽。而少陰空虛。若下之傷陰。則小便

不利而直視。失洩則氣亦脫矣。如被汗下而被火攻者。外火助內熱。熏蒸而發黃。劇則火邪擾心。如驚癇。肝風熾盛而癎瘓。皆敗壞之象也。若止火熏之一逆。尚可引日苟延。若既汗又下。而再逆之。更促其命期也。

雄按。彼冬溫春溫之先犯手太陰者。皆曰風溫。乃吸受之溫風也。此伏邪內發。誤汗致逆者。亦曰風溫。乃內動之虛風也。然風溫在肺。祇宜清解。若誤以辛熱之藥汗之。亦有自汗。多眠。鼻鼾。難語之變。余治梁宜人一案。可質也。案載續編

淦按。鼻鼾。是肺腎相關。子母同病。自汗出。乃陰不內守。

心液外越也。未必盡是少陰一經之證。

服桂枝湯。大汗出後。大煩渴不解。脈洪大者。白虎加人參湯。主之。

張路玉曰。此本溫熱病。誤認風傷衛。服桂枝湯也。若風傷衛。服湯後。必微汗而解矣。不知此本溫熱。誤服桂枝湯。遂至脈洪大。大汗煩渴不解。若誤用麻黃。必變如上條之危殆。蓋桂枝治自外入之風邪。石膏治自內發之熱邪。故白虎湯爲熱邪中暍之的方。專解內蒸之熱。非治在經之熱也。大汗傷津。故加人參以救液。則煩渴自解矣。

尤拙吾曰。溫邪。非發散可愈。卽有表證。亦豈辛溫可發。
桂枝湯。爲傷寒表病。而裏和者設。溫證。邪從裏發。而表
且未病。誤用桂枝。適足以助邪而耗液。蓋伏寒化熱。少
陰之精。已被劫奪。更用辛熱。是絕其本。而資之脫也。若
曰少陰。本寒標熱。邪入其界。非溫不散。然溫病之發。寒
已變熱。其欲出之勢。有不待引之而自出者。其不能出
者。必皆陰精已涸者也。不然甯有不出者耶。

雄按。先曾祖云。風寒爲病。可以桂枝湯發汗而愈。若發
汗而熱反灼者。乃風溫病。溫卽熱之謂也。後人不爲詳
玩。謂風溫爲汗後壞病。抑何固耶。夫病本熱也。加以桂

枝之辛熱。故液爲熱迫。而汗大出。液去則熱愈灼。故大煩渴而脈洪大。連上條似論一證。主以白虎加人參。正內經風淫熱淫治以甘寒之旨也。又醫林改錯謂發熱有汗之證。從未見桂枝湯治愈一人。是亦溫病也。

太陽與少陽合病。自下利者。與黃芩湯。凡若嘔者。黃芩加半夏生薑湯。凡主之。

張路玉曰。黃芩湯乃溫病之主方。卽桂枝湯以黃芩易桂枝而去生薑也。蓋桂枝主在表風寒。黃芩主在裏風熱。不易之定法也。其生薑辛散。非溫熱所宜。故去之。○溫病始發。卽當用黃芩湯。去熱爲主。傷寒傳至少陽。熱

邪漸次入裏。方可用黃芩。佐柴胡解之。此表裏寒熱之次第也。

周禹載曰。明言太少二陽。何不用二經藥。非傷寒也。傷寒由表入裏。此則自內發外。無表何以知太少二陽。或脇滿。或頭痛。或口苦引飲。或不惡寒而卽熱。故不得謂之表也。如傷寒合病。皆表病也。今不但無表。且有下利裏證。傷寒協熱利。必自傳經而入。不若此之卽利也。溫何以卽利。外發未久。內鬱已深。其人中氣本虛。豈能一時盡泄於外。勢必下走作利矣。

雄按。少陽膽木。挾火披猖。嘔是上衝。利由下迫。何必中

虛始利。飲聚而嘔乎。半夏生薑。專開飲結。如其熱熾。宜

易連茹。

楊云。此注精當。非前注所及。

三陽合病。脈浮大。上關上。但欲眠睡。目合則汗。

周禹載曰。溫氣發出。乃至三陽皆病。其邪熱溷實。不言可知。故其脈浮大也。意邪伏少陰時。則尺脈亦已大矣。今因由內發外。由下達上。而浮大見於關以上。故曰上關上也。邪雖上見陽位。少陰之源未靖。則欲眠。尙顯本證。而目合則汗。卽爲盜汗。又顯少陽本證。何以獨見少陽。因母虛子亦虛。而少陰邪火。與少陽相火。同升燔灼也。所以稍異熱病者。但目合則汗。不似熱病之大汗不

止也。然何以不言。太陽陽明二經證。以浮爲太陽經脈。大爲陽明經脈也。

雄按。御纂醫宗金鑑。正誤篇云。浮大上之上字。當是弦字。始合三陽合病之脈。至治法。繆仲淳擬用百合。一兩。麥冬。五錢。知母。栝藎根。白芍藥。各二錢。鼈甲。三錢。炙甘草。一錢。竹葉。五十片。

楊云。此條與發汗已。身灼熱之風溫。正是一串。初起爲

此病。汗後則爲風溫證。

徐亞枝云。楊侯嘗語余曰。傷寒

次序其意以洞溪傷寒類方。但當因證以論方。不必循經而論證。爲直截了當。蓋逐條分讀。則其間脈絡貫通。處自見。若泥次序。求連綴。不免鑿矣。及讀此評。益服其讀書另具隻眼。

金匱曰。溫瘧者。其脈如平。身無寒但熱。骨節疼煩。時嘔。白虎加桂枝湯。八十一主之。

尤拙吾曰。此與內經論瘧文不同。內經言其因。此詳其脈與證也。瘧瘧。溫瘧。俱無寒但熱。俱嘔。而其因不同。瘧瘧者。肺素有熱。而加外感。爲表寒裏熱之證。緣陰氣內虛。不能與陽相爭。故不作寒也。溫瘧者。邪氣內藏。少陰。至春夏而始發。爲伏氣外出之證。寒蓄久而變熱。故亦不作寒也。脈如平者。病非外感。故脈如其平時也。骨節疼煩。時嘔者。熱從少陰出。外舍於腎之所合。而上併於陽明也。白虎甘寒除熱。桂枝則因勢而達之耳。

雄按。喻氏謂仲景論瘧。旣云弦數者。多熱矣。而復申一義曰。弦數者。風發。見多熱不已。必至於極熱。極熱則生風。風生則肝木侮土。而傳其熱於胃。坐耗津液。此非可徒求之藥。須以飲食消息。止其熾熱。卽梨汁。蔗漿。生津止渴之屬。正內經風淫於內。治以甘寒之旨也。

⊗ 仲景伏氣熱病篇

傷寒論曰。陽明脈浮而緊。咽燥口苦。腹滿而喘。發熱汗出不惡寒。反惡熱。身重。若發汗。則躁。心憤憤。反譟語。若加燒針。必怵惕煩躁。不得眠。若下之。則胃中空虛。客氣動膈。心下懊懣。舌上胎者。梔子豉湯主之。若渴欲飲水。口乾舌

燥者。白虎加人參湯。主之。若脈浮發熱。渴欲飲水。小便不利者。豬苓湯。主之。

周禹載曰。浮緊傷寒脈也。何以爲熱病。以其發於夏。不惡寒。反惡熱也。又何以獨言陽明。以夏時。溼熱上蒸。邪從胃發。且腹滿而喘。種種皆陽明證也。然咽燥非少陰證耶。不知陽明爲從出之途。少陰其伏藏之地也。夫旣陽明熱病。曷又爲脈反浮緊。正以夏時。肌腠本開。人本多汗。風邪襲入。致腠理反閉。而無汗。故夏之風脈。每似冬之寒脈也。今云汗出。而脈亦浮緊者。正因浮甚有力。熱邪盛而致也。若不知者。以辛熱汗之。耗其精液。必至

躁妄昏昧。火劫溫針。燥其陰血。必至驚擾無寐。下之必亡其陰。必至胃虛邪陷。心中懊憹。此皆誤治。將何以救之乎。觀舌上胎滑者。則外邪尚在。以梔子解熱。香鼓祛邪。是爲合法。若渴飲漿水。口乾舌燥。知其外邪亦入。總以白虎湯爲治。加人參者。以誤治而精液大傷也。設使緊脈去。而浮在。發熱引水。小便不利。則其浮爲虛。而熱已入膀胱。入膀胱者。曷不飲以四苓。而主以豬苓耶。傷寒之小便不利。結於氣分。熱病之小便不利。由於血分者也。因邪鬱旣深。耗液日久。故必以阿膠補虛。滑石祛熱。而無取乎白朮也。

沈堯封曰。未經誤治之時。本是白虎湯主治。

陽明病。汗出多。而渴者。不可與豬苓湯。以汗多。胃中燥。豬苓湯復利其小便故也。

周禹載曰。渴而小便不利。本當用豬苓湯。然汗多。在所禁也。此與傷寒入腑。不令洩數同意。蓋汗出陽明。已劫其津。汗出復多。更耗其液。津液曾幾。更可下奪耶。當以白虎加人參。去其熱。則小便之不利者。津回而自利矣。沈堯封曰。穀食在胃。全賴津液充足。方能滑潤達下。若津液一枯。穀食卽燥結難下。故陽明非燥不病。然燥者。五氣之一。而五氣中。風與熱。亦能致燥。易曰。燥萬物者。

莫熯乎火。又曰。風自火出。此三義皆因乎天者。若人之致燥有二。汗與小便是也。苟過多。則亦未有不燥者矣。三陽合病。腹滿身重。難以轉側。口不仁而面垢。譫語遺溺。發汗則譫語。下之則額上生汗。手足逆冷。若自汗出者。白虎湯主之。

雄按發汗則譫語下似脫一甚字

馬元儀曰。此證發汗。則偏於陽。而津液傷。攻下。則偏於陰。而真氣損。惟有白虎一法。主解熱而不礙表裏。但三陽病。脈當浮大。而亦有微弱不起者。以邪熱抑遏。不得外達。待清其壅。則脈自起。勿謂陽衰。故脈微也。

雄按更不可誤

以為陽證見陰脈

章虛谷曰。此條邪熱更重。彌漫三陽。而致腹滿身重。難以轉側。口不仁者。不知味也。由胃中濁壅熏蒸。故又面垢也。熱甚神昏。則譫語遺溺。若未經誤治。而自汗出者。主以白虎湯。雄按仲淳云。宜加百合。此倒裝文法。謂非誤發其汗之汗。故名自汗出。雄按尤在涇注云。若自汗。若誤發其汗。而致譫語。雄按白虎加人參湯。或下之。額上生汗者。是絕汗也。手足逆冷。陽氣將亡。卽所謂再逆促命期。非白虎所可治也。

仲景外感熱病篇

太陽中熱者。喝是也。其人汗出惡寒。身熱而渴也。

王安道曰。暑熱者。夏之令也。大行於天地之間。人受傷而爲病。名曰中暑。亦曰中熱。一也。葉香巖曰。熱地如鐵。傷人最速。趙以德曰。汗出惡寒。身熱而不渴者。中風也。渴者。中暈也。

周禹載曰。冬月有寒。則能傷人。名中寒。夏月有熱。亦能傷人。名中熱。此是外來之熱。故曰中。非卽伏寒發出。夏必病熱之熱也。然而同用白虎者。總以所傷在氣。則所主在金。所病在熱。生金者土。金生者水。金病。則我母我子俱病。故與伏氣之在少陰。發出之由陽明者。無異。要皆並主一湯。全不因冬月之伏。與夏月之中。爲二義也。

又全不以伏氣之渴與今病之渴爲稍異也。嗚呼。聖人於此有意立方。無心表異。以千古之前。自有此理。萬世之下。自有此悟也。

雄按。古人但以寒爲肅殺之氣。而於暑熱甚畧。是闕文也。

徐洄溪曰。凡汗出多之病。無不惡寒者。以其惡寒汗出。而誤認爲寒。妄用熱劑。則立危矣。

何報之曰。汗大泄。不止亡陽。且令腎水竭絕。津液內枯。是謂亡陰。急當滋水之上源。三伏之義。爲金受囚也。金遇丙丁。失其清肅。而壬水絕於巳。癸水絕於午。西北之寒清絕矣。前人有謂夏月宜補者。乃補天元之真氣。非補熱火也。令人夏食寒。是也。

沈堯封曰。此是熱病證。據素問。在天爲熱。在地爲火。熱者火之氣也。故熱乃五氣之一。而熱病卽傷寒有五之一。傷寒論以難經熱字。恐與下文溫字相混。故特指出曰。喝是也。感烈日之氣而病。卽素問寒暑燥溼風之暑病。或曰。喝是陽邪。暑是陰邪。土潤溽暑。熱兼溼言也。似與喝有異。曰。寒往則暑來。與寒對待。非專言熱。而何古人稱暑喝熱一也。若溼熱併至之病。難經名曰。溼溫。不名暑。迨至隋唐後。皆指溼熱爲暑。於是眞暑之名失。而喝之名。更不知爲何病矣。雄按北齊書後主紀六月遊南苑從官喝死者六十人。千金須知云。熱死曰喝。是唐時尙知暑喝之爲熱也。

雄按。內經云。在天爲熱。在地爲火。其性爲暑。又云。歲火太過。炎暑流行。蓋暑爲日氣。其字從日。曰炎暑。曰酷暑。皆指烈日之氣而言也。夏至後。有小暑。大暑。冬至後。有小寒。大寒。是暑卽熱也。寒卽冷也。暑爲陽氣。寒爲陰氣。乃天地間。顯然易知之事。並無深微難測之理。而從來歧說偏多。豈不可笑。更有調停其說者。強分動得靜得。爲陰陽。夫動靜惟人。豈能使天上之暑氣。隨人而判別乎。況內經有陰居避暑之文。武王有樹蔭暍人之事。仲景以白虎湯爲熱病主方。同條共貫。理益彰彰。何後賢之不察。而好爲聚訟。以紊道深文。以晦道耶。若謂暑必

兼溼。則亢旱之年。溼難必得。况兼溼者。何獨暑哉。蓋溼無定位。分旺四季。風溼。寒溼。無不可兼。惟夏季之土爲獨盛。故熱溼多於寒溼。然暑字從日。日爲天氣。溼字從土。土爲地氣。霄壤不同。雖可合而爲病。究不可謂暑中原有溼也。

傷寒。脈浮滑。此表有熱。裏有寒。白虎湯臣主之。

王三陽曰。經文寒字。當作邪字解。亦熱也。

方中行曰。世本作表有熱。裏有寒。必係傳寫之誤。夫白虎。本爲治熱病。暑病之藥。其性大寒。安得裏有寒者。可服之理。詳本文。脈浮滑。不但無緊。且復多滑。乃陽氣甚

而鬱蒸。此裏有熱也。裏熱甚。必格寒於外。多厥逆身涼。而爲亢害之證。此表有寒也。厥陰篇中。脈滑而厥者。裏有熱也。白虎湯主之。則知此表裏二字。爲錯誤可知。當爲上下更易。

魏念庭曰。此裏尙爲經絡之裏。非臟腑之裏也。

沈堯封曰。裏有寒之寒字。乃喝字之誤。如果裏有寒。何以反用石膏知母乎。表有熱。卽身熱也。上節止言病名。不言脈證。此節詳言脈證。出方主治。兩節本是相承。叔和校訂時。此節幸有寒字之誤。不被摘出。若見喝字。早已摘置別論中矣。程郊倩云。喝病脈不浮。不思傷寒論

之喝。卽難經之熱病也。難經云。熱病之脈。陰陽俱浮。浮之而滑。沈之散澀。此是緊要處。豈可模糊讀過。本條脈浮滑。與難經熱病脈合。則白虎的是熱病主方。而寒字的是喝字之誤。

雄按。楊素園大令云。此條寒字。諸家所辯。未能妥帖。徐君亞枝謂。當作痰字解。於義較協。余謂徐君此解。可稱千古隻眼。夫本論無痰字。如溼家。胸中有寒之寒字。亦作痰字解。蓋痰本作淡。會意二火。搏水成痰也。彼溼家。火微溼盛。雖渴而不能飲。是爲溼痰。此喝病。火盛鑠液。脈既滑矣。主以白虎湯。則渴欲飲水。可知是爲熱痰。凡

痰因火動。脈至滑實。而口渴欲飲者。卽可以白虎治之。

況喝家乎。

汪按。靈素兩經亦但曰水曰寒。無一痰字。

傷寒。脈滑而厥者。裏有熱也。白虎湯

七主之。

張路玉曰。滑。陽脈也。故其厥爲陽厥。裏熱鬱熾。所以其外。反惡寒。厥逆。往往有。脣面爪甲俱青者。故宜白虎以清裏而除熱也。

傷寒。無大熱。口渴。心煩。背微惡寒者。白虎加入參湯八主之。

張兼善曰。白虎專治大煩。大渴。大燥。大熱之證。惟恐表證未罷。而早用之。若背微惡寒。及時時惡風。一條。因其

中煩渴燥熱已甚。非白虎不能遏也。

沈堯封曰。背爲陽。背微惡寒者。陽虛證也。但陽有不同。真水真火。是腎中之陰陽也。氣血。是營衛之陰陽也。此條口燥渴。心煩。則喝熱內熾。仍是白虎證。惟喝熱傷其衛氣。致背微惡寒。故加人參。補其衛也。至若少陰病。口中和。其背惡寒者。則衛陽與腎陽並傷。故人參與附子並用。以兩補之也。

雄按。吳鶴皋云。背微惡寒者。但覺微寒。而不甚也。既有燥渴。則白虎加參。用可無疑。若背惡寒。而不燥渴者。不可用也。余謂以下條參之。必有汗。故可用也。

傷寒。脈浮。發熱。無汗。其表不解者。不可與白虎湯。渴欲飲水。無表證者。白虎加人參湯。主之。

沈堯封曰。此承上文。言煩渴。背惡寒。固當用白虎。加人參湯。但亦有中喝。而外復傷風寒。亦能令惡寒。發熱。脈浮。更當於有汗無汗上。辨表證解不解。以定此方之可用不可用耳。

傷寒病。若吐下後。七八日不解。熱結在裏。表裏俱熱。時時惡風。大渴。舌上乾燥而煩。欲飲水數升者。白虎加人參湯。主之。

張路玉曰。詳此條表證。比前較重。何以亦用白虎加參

耶。本文熱結在裏。表裏俱熱二句。已自酌量。惟熱結在裏。所以表熱不除。邪火內伏。所以惡風大渴。舌燥而煩。欲飲水不止。安得不以生津解熱爲急耶。

雄按。御纂醫宗金鑑。正誤篇。時時惡風。作時汗惡風。當遵之。又沈亮宸云。舌乾且燥。謂視之無液也。然則溫熱之審舌苔。以察津液。仲師已逗其倪矣。

太陽中暈者。身熱疼重。而脈微弱。此以夏月傷冷水。水行皮中所致也。一物瓜蒂湯二十二主之。

皇甫士安曰。脈盛身寒。得之傷寒。脈虛身熱。得之傷暑。蓋寒傷形。而不傷氣。所以脈盛。熱傷氣。而不傷形。所以

脈虛。

雄按所云身寒者雖發熱而仍惡寒不似暑熱病之喜涼惡熱也。

朱奉議曰。夏月發熱惡寒頭痛。身體肢節痛重。其脈洪

盛者。熱病也。夏月自汗惡寒。身熱而渴。其脈微弱者。中

暑也。

雄按此注之熱病乃夏至後所發之伏邪也。內經亦謂之暑病。中暑者夏月外感之熱病。亦曰中暈。

病有內外之殊。脈有洪微之別。是微弱本暈脈。惟身重爲溼候。後條雖亦身重而口開齒燥。暑熱內熾已極。似宜急與甘寒救液也。

方中行曰。夏日則飲水。人之常事。而曰傷。何哉。良由暑

迫。飲之過多。或得之冷水澡洗。暑反入內也。

張路玉曰。此條言因熱傷冷之病。乃中暈之變證。喻氏謂無形之熱傷其肺金。則用白虎加人參湯以救之。有

形之溼。傷於肺金。則用瓜蒂湯救之。各有所主也。

太陽中暍者。發熱惡寒。身重而疼痛。其脈弦細。朧遲。小便已。灑灑然毛聳。手足逆冷。小有勞。身即熱。口開。前板齒燥。若發汗。則惡寒甚。加溫針。則發熱甚。數下之。則淋甚。

成聊攝曰。病有在表者。有在裏者。有表裏俱病者。此則表裏俱病者也。發熱惡寒。身重疼痛者。表中暍也。脈弦細。朧遲者。中暑脈虛也。小便已。灑灑然毛聳。手足逆冷者。太陽經氣不足也。小有勞。身即熱者。謂勞動其陽。而

暍即發也。口開。前板齒燥者。裏有熱也。

雄按。即此一端。可見其爲熱熾。

津枯之候。雖身重惡寒。豈可再投清暑益氣湯五苓散。藿香正氣丸等。辛溫燥烈。以重劫其陰液乎。東垣虛谷。

之言貽誤。後人不淺。內經云。因於暑。汗煩則喘喝。口開。謂喘喝也。

以喘喝不止。故前板齒燥。若發汗以去表邪。則陽氣外

虛。故惡寒甚。若以溫針助陽。則火熱內攻。故發熱甚。若

下之以除裏熱。則內虛而膀胱燥。故淋甚。雄按觀此治

仲景雖未立方。而甘涼撤熱存津之當用。已可不言而喻矣。趙氏方氏主用白虎加人參湯。殆從三陽合病。此

例而出。似亦近理。

沈堯封曰。此言精氣素虧。而中喝者。

傷寒。脈結代。心動悸者。炙甘草湯。三十一王之一名復脈湯。脈

按之來。而緩時一止。復來者。名曰結。又脈來動而中止。更

來。小數中有還者。反動。名曰結。陰也。脈來動而中止。不能

自還。因而復動者。名曰代陰也。得此脈者。必難治。

方中行曰。脈結代。而心動悸者。虛多實少。譬如寇欲退散。主弱不能遣發。而反自徬徨也。復脈。乃核實義之名。然則是湯也。必欲使虛者加進。而馴至於實。則實者自退散。而還復於元之義也。

喻嘉言曰。脈者。氣血之先。仲景於津液內亡之脈。名之曰結陰。代陰。又名無陽。原有至理。何可不知。聊爲四言俚句。以明其義。胃藏津液。水穀之海。內充臟腑。外灌形骸。津多脈盛。津少脈衰。津結病至。津竭禍來。脈見微弱。宜先建中。汗則津越。下則津空。津耗脈細。不可妄攻。小

便漸減。大便自通。陽明內實。急下救焚。少緩須臾。津液無存。陽明似實。稍用調承。驅熱存津。此法若神。腎中真陽。陰精所裁。胃中真陽。津液所胎。陰枯津盛。冽泉可溉。陰精衰薄。餅磬疊哀。何謂結陰。無陽脈闔。何謂代陰。無陽脈奪。經揭無陽。津液欲竭。較彼亡陽。天地懸闊。

沈堯封曰。此論精氣素虧。而感微邪之治。前節有脈證。而無方治。此未必卽是前節主方。然觀方中藥。又甯必不可以治前證。

脈浮而芤。浮爲陽。芤爲陰。浮芤相搏。胃氣生熱。其陽則絕。方中行曰。浮爲氣上行。故曰陽。芤爲血內損。故曰陰。胃

中生熱者。陰不足以和陽。津液乾而成枯燥也。雄按沈氏云浮

爲邪。孔爲陰血虛。以余論之。凡見浮孔相搏之脈。多是暑熱傷津。

沈堯封曰。衛氣爲陽。人之所知也。津液爲陽。人之所未知也。經云。上焦出氣。宣五穀味。熏膚充身。澤毛。若霧露之漑。是謂氣。衛氣卽津液也。故在外之津液少。則曰無陽。不能作汗。在內亡津液。則曰陽絕於裏。要之。言陽也。卽言衛氣也。卽言津液也。

仲景溼溫篇

太陽病。關節疼痛而煩。脈沈而細者。此名溼痺。其候小便不利。大便反快。但當利其小便。

沈堯封曰。傷寒論原序云。撰用素難。當卽以素難釋之。
難經。傷寒有五。卽素問寒暑燥溼風之五氣爲病也。故
仲景於太陽論中。五證並列。挨次剖析。此論溼痺。卽難
經之溼溫證也。素問在天爲溼。在地爲土。溼乃土之氣
也。故溼爲五氣之一。溼溫乃傷寒有五之一。編傷寒者。
以溼暍爲非傷寒。置之別論。然則中風亦非傷寒。何以
獨存卷首耶。難經云。溼溫之脈。陽濡而弱。陰小而急。與
此稍異。

又曰。傷寒。旣以頭痛胃實等項。分六經。卽以汗字判風
寒。渴字認燥熱。小便不利。認溼氣。縱橫辨別。邪無遁形。

矣。讀者當於此等著實處留心。

溼家之爲病。一身盡疼。發熱。身色如熏黃。

倪冲之傷寒彙言。此溼家爲病之總綱也。

金

蓋體氣素

以溼爲事者。是爲溼家。

辨條

其痛與痺痛不同。溼在關節

而疼。故曰痺。今一身盡疼。而表有熱。故聊攝稱曰在經。

熏黃與橘子黃。同是溼熱。彼以熱勝者。黃而明。此以溼

勝者。黃而晦。宜茵陳五苓散主之。海藏以熏黃爲陰黃。

蓋既溼勝。則次傳寒中。小便自利者。有之。

雄按此由但清其熱不治

其溼故次

傳寒中。尤附湯主之。

折衷

沈堯封曰。丹溪云。如造麴然。溼熱鬱久。則發黃也。

雄按。溼熱發黃。名曰黃疸。皆是暴病。故仲景以十八日爲期。其餘所因甚多。有穀疸。酒疸。女勞疸。黃汗。及冷汗。便澹。氣虛之陰黃。身面浮腫。睛白能餐。勞倦之弱黃。神志不足。猝受恐嚇。膽氣外泄之驚黃。肝木橫肆。脾胃傷殘。土敗而色外越之痿黃。皆與暴病不同。不可概目爲溼熱病矣。

溼家其人但頭汗出。背強。欲得被覆向火。若下之早。則噦。胸滿。小便不利。舌上如胎者。以丹田有熱。胸中有寒。渴欲得水。而不能飲。則口燥煩也。

尤在涇曰。寒溼居表。陽氣不得外通。而但上越。爲頭汗。

出爲背強。欲得被覆向火。是宜用溫藥以通陽。不可與
攻法以逐溼。乃反下之。則陽更被抑。而噦乃作矣。或上
焦之陽不布。而胸中滿。或下焦之陽不化。而小便不利。
隨其所傷之處。而爲病也。舌上如胎者。本非胃熱。而舌
上津液燥聚。如胎之狀。實非胎也。蓋下後。陽氣反陷於
下。而寒溼仍聚於上。於是丹田有熱。而渴欲得水。胸中
有寒。而復不能飲。則口舌燥煩。而津液乃聚耳。

雄按。胸中有寒之寒字。當作痰字解。胸中有痰。故舌上
如胎。其津液爲痰所阻。故口燥煩。而痰飲乃水之凝結。
故雖渴。而不能飲也。

楊云。此注極明確。凡傷寒論
言胸中有寒者。俱作痰解。

溼家。下之額上汗出。微喘。小便利者死。若下利不止者。亦死。

尤在涇曰。溼病在表者。宜汗出。裏者。宜利小便。苟非溼熱蘊積成實。未可遽用下法。

楊云。溼證不可妄下。

額汗出。微喘。陽

已離而上行。小便利。下利不止。陰復決而下走。陰陽離決。故死。一作小便不利者死。謂陽上浮而陰不下濟也。亦通。

雄按。張石頑云。自此而推之。雖額汗出微喘。若大小便不利者。是陰氣未脫。而陽之根猶在也。下雖大小便利。若額上無汗。不喘。是陽氣不越。而陰之根猶在也。則非

離決。可以隨其虛實而救之。至於下利不止。雖無頭汗。喘逆。陽氣上脫之候。亦死。亦有下利不止。小便反閉。而額上汗出者。謂之關。經云。關格不通。頭無汗者。可活。有汗者。死。

問曰。風溼相搏。一身盡疼痛。法當汗出而解。值天陰雨不止。醫云。此可發汗。汗之病不愈者。何也。答曰。發其汗。汗大出者。但風氣去。溼氣在。是故不愈也。若治風溼者。發其汗。但微微似欲汗出者。風溼俱去也。汪按。古人卽表汗。亦須有節度。如此。奈何。近人必令其汗。又欲令其多。取此與傷寒論桂枝湯下語。亦可互參。

倪沖之。傷寒彙言。溼家不惟不可誤下。亦不可誤汗。惟

風溼相搏一證。

傳郊

風從前來。溼傷卑下。兩至搏擊。一身

盡爲疼痛。

子絲

此是微挾表邪。法當汗出。而病方解。

傳郊

然

時值淫雨。

隱庵

不免溼氣盛行。

統

醫云。此可發汗。若發大

汗。而病不愈。不惟風溼之邪不解。而且傷真氣矣。

傳郊

況

風之乘罅也。速。溼之侵人也。漸。

子絲

然風在外。而溼在內。

且大汗出。而漬衣被。汗轉爲溼。風氣雖去。而溼氣仍隱

伏而存留。是故不愈也。

純

使之微微似欲汗出。則正氣

宣發。充身澤毛。若霧露之灌溉。與病相應。斯正氣行。而

邪氣卻。營衛和。而風溼並解矣。

忠

可

章虛谷曰。治風溼者。必通其陽氣。調其營衛。和其經絡。

使陰陽表裏之氣同流。則其內溼隨三焦氣化。由小便而去。表溼隨營衛流行。化微汗而解。陰溼之邪既解。風邪未有不去者。若大發其汗。陽氣奔騰。風爲陽邪。隨氣而泄。溼邪陰滯。故反遺留。而病不愈也。此治風溼與治風寒不同者。雖寒溼同爲陰邪。而寒清溼濁。清者易散。濁者黏滯。故汗法大有區別也。

溼家病。身疼痛。發熱。面黃而喘。頭暈。鼻塞而煩。其脈大。自能飲食。腹中和。無病。病在頭中。寒溼故鼻塞。內藥鼻中則愈。

章虛谷曰。此所謂霧露清邪。中於上也。三陽經脈上頭

而行於身表。頭中寒溼。則表氣不宣。故身疼發熱。肺開竅於鼻。而行氣於皮毛。邪從鼻入。溼遏其陽而上蒸。則面黃。氣閉則喘。氣壅則頭痛鼻塞而煩。皆肺氣窒塞。不得下降。故脈反大。其與溼中於下。而在陰之脈沈細者。迥不同也。肺通喉。胃通咽。邪在肺。不在胃。故自能飲食。腹中和。無病。止頭中寒溼。故鼻塞。當用辛香苦泄之藥。納鼻中。如近世之痧藥。雄按鼻煙亦可用。古人惟用瓜蒂散十四。使肺氣通達。其溼邪化水。從鼻中出。則愈。汪按瓜蒂末嗅則水從鼻出。若湯飲則吐。

傷寒。瘀熱在裏。身必發黃。麻黃連軹赤小豆湯五十五主之。

韋虛谷曰。表邪未解。溼熱內瘀。身必發黃。故以麻黃解

表連軹赤豆等味。利肺氣。以清溼熱。其邪在經絡。故從表解之。

雄按。余治夏月。溼熱發黃。而表有風寒者。本方以香薷易麻黃。輒効。楊云。夏月用香薷。與冬月用麻黃。其理正同。

傷寒。身黃發熱者。梔子檼皮湯六十一主之。

尤在涇曰。此熱。瘀而未實之證。熱瘀故身黃。熱未實。故發熱。而腹不滿。梔子徹熱於上。檼皮清熱於下。而中未及實。故須甘草以和之耳。

沈堯封曰。梔檼湯。清熱利小便。治溼熱之主方也。程扶生。以麻連小豆湯。爲溼熱主方。不思麻連小豆湯。發汗

之方。惟外兼風寒者宜之。梔檳湯利小便之方也。楊云。分析。
極清。若以麻連小豆湯爲主方。不惟梔檳湯無著落。卽論
內。但當利小便句。亦無著落。

傷寒七八日。身黃如橘子色。小便不利。腹微滿者。茵陳蒿
湯七十主之。

尤在涇曰。此則熱結在裏之證也。身黃如橘子色者。色
黃而明。爲熱黃也。若陰黃。則色黃而晦矣。熱結在裏。爲
小便不利。腹滿。故宜茵陳蒿湯。下熱通瘀爲主也。

陽明病。發熱汗出。此爲熱越。不能發黃也。但頭汗出。身無
汗。劑頸而還。小便不利。渴飲水漿者。此爲瘀熱在裏。身必

發黃茵陳蒿湯

七十一主之

尤在涇曰。熱越。熱隨汗而外越也。熱越則邪不蓄而散。安能發黃哉。若但頭汗出而身無汗。劑頸而還。則熱不得外達。小便不利。則熱不得下泄。而又渴飲水漿。則其熱之蓄於內者方熾。而涇之引於外者無已。涇與熱合。瘀鬱不解。則必蒸發爲黃矣。茵陳蒿湯苦寒通泄。使病從小便出也。

陽明病。面合赤色。不可攻之。攻之必發熱。色黃。小便不利也。

沈堯封曰。此是寒邪外束之涇溫證也。麻連小豆湯是

其主方。除卻惡寒。卽是梔檠證。更加腹微滿。卽是茵陳蒿證。

章虛谷曰。上明發黃之證。此又明致黃之由也。面赤者。熱鬱在經。當以汗解。若攻之。傷其腑氣。則在經之熱。反從內走。與水穀之氣。鬱蒸發黃。三焦閉塞。而小便不利也。

陽明病。無汗。小便不利。心中懊懣者。身必發黃。

章虛谷曰。雖未誤下。而無汗。小便不利。其邪熱閉結。心中懊懣。與胃中水液鬱蒸。而身必發黃也。

陽明病。被火。額上微汗出。小便不利者。必發黃。

喻嘉言曰。溼停熱鬱。而誤火之。則熱邪愈熾。津液上奔。額雖微汗。而周身之汗。與小便。愈不可得矣。發黃之變。安能免乎。

仲景疫病篇

山陰陳坤載安注

寸口脈。陰陽俱緊者。法當清邪中于上焦。濁邪中于下焦。清邪中上。名曰潔也。濁邪中下。名曰渾也。陰中于邪。必內慄也。表氣微虛。裏氣不守。故使邪中于陰也。陽中于邪。必發熱。頭痛。項強。頸攣。腰痛。脛痠。所謂陽中霧露之氣。故曰清邪中上。濁邪中下。陰氣爲慄。足膝逆冷。便溺妄出。表氣微虛。裏氣微急。三焦相溷。內外不通。上焦怫鬱。藏氣相熏。

口爛食斷也。中焦不治。胃氣上衝。脾氣不轉。胃中爲濁。營衛不通。血凝不流。若衛氣前通者。小便亦黃。與熱相搏。因熱作使。遊于經絡。出入藏府。熱氣所過。則爲癰膿。若陰氣前通者。陽氣厥微。陰無所使。客氣入內。噫而出之。聲喑咽塞。寒厥相逐。爲熱所擁。血凝自下。狀如豚肝。陰陽俱厥。脾氣孤弱。五液注下。下焦不闔。清便下重。令便數難。臍築湫痛。命將難全。

此一節言受疫之源。疫者。卽寒暑燥溼風夾雜而成。清濁不分。三焦相瀾。其曰中上中下者。是就邪之清濁而言。曰陰中陽中者。亦卽邪之中上中下而言。扼要全在

中焦得治爲主。中焦者脾胃是也。脾胃之氣有權。若衛氣前通者。邪可從經而汗解。若營氣前通者。邪可從腑而下解。倘脾胃之氣不足。邪必內陷傷臟。五液注下。便難臍痛。命將難全矣。爲癰膿下豚肝。指其重者而言。未必定當如是也。所以疫證最怕邪伏募原。內壅不潰。爲難治。

傷寒脈陰陽俱緊。惡寒發熱。則脈欲厥。厥者脈初來大。漸

漸小。更來漸漸大。是其候也。

楊云疫病乃穢邪彌漫其脈。恆模糊不清。此所云漸漸大。

漸漸小。正其候也。

如此者。惡寒甚者。翕翕汗出。喉中痛。熱多者。目

赤脈多。睛不慧。

楊云凡疫證目睛必不了了。

醫復發之。咽中則傷。若復

下之。則兩目閉。寒多者。便清。穀熱多者。便膿血。若熏之。則身發黃。若熨之。則咽燥。若小便利者。可救之。小便難者。爲危殆。

此節言疫邪初起之證與脈也。陰陽俱緊。惡寒發熱。與傷寒同。而漸小漸大之厥脈。是疫之所異也。因邪氣深伏。正氣不得宣通。所以先必惡寒。而甚則又形熱狀。汗出。喉痛目赤也。若因惡寒而發汗。則助熱上蒸。而咽傷。若因內熱而下之。則陽氣內陷。而目閉。陰邪多。則便清。穀陽邪多。則便膿血。熏之。則溼熱鬱蒸。而身黃。熨之。則熱燥津液。而咽燥。總因邪伏募原。故汗下熏熨皆誤也。

其可救與不救。當於小便利不利驗之也。楊云溫病小便利則陰氣

未竭疫證小便利則腑氣尚通邪有出路故俱可治

傷寒發熱頭痛微汗出發汗則不識人熏之則喘不得小便心腹滿下之則短氣小便難頭痛背強加溫針則衄

此節言清邪之中上者故陽分之證居多清邪中上直

入募原也其發熱頭痛微汗為邪熱熏蒸非在表也故

發汗則熱盛而神昏。楊云汗為心液過汗則心虛而邪蔽清陽熏之則熱壅

而作喘。楊云熏之則以熱益熱而傷水之上源不得小便心腹滿者氣不

通也亦非在裏短氣小便難頭痛背強者下傷津液也

衄者溫針傷絡也。楊云邪熱入營故衄治當先達募原不致此變

傷寒發熱。口中勃勃氣出。頭痛。目黃。衄不可制。貪水者。必

嘔。楊云水積而惡水者。厥。楊云熱盛而若下之。咽中生瘡。

楊云熱遺於上故生瘡假令手足溫者。必下重便膿血。楊云四末屬脾溫則熱邪

充斥脾胃。頭痛目黃者。若下。則兩目閉。楊云溫邪非蕩滌所能驅而反虛其

目閉。貪水者。脈必厥。其聲嚶。咽喉塞。楊云亦水積若發汗。

則戰慄。陰陽俱虛。楊云邪在裏不在表惡水者。若下之。則

裏冷。不嗜食。大便完穀出。楊云惡水則溼盛熱若發汗。則

口中傷。舌上白胎。楊云津液外竭煩躁脈數實。楊云熱不

大便六七日。後必便血。若發汗。則小便自利也。楊云太陽

液汗之則正虛而不能約束

此節言濁邪之中下者。故陰分之證居多。濁邪中下者。非下受也。仍從募原分布。謂陰邪歸陰也。邪併於陰。則陰實陽虛。故有勃勃氣出。頭痛目黃。衄不可制。貪水咽瘡。下重。便膿血。諸證。此陰實也。其目閉。脈厥。聲嚶。咽塞。戰慄。不嗜食。大便完穀。小便自利者。此陽虛也。實爲真實。虛爲假虛。故非偏陰偏陽可治。

病人無表裏證。發熱七八日。雖脈浮數者。可下之。假令已下。脈數不解。合熱則消穀善飢。至六七日。不大便者。有瘀血也。宜抵當湯。十八若脈數不解。而下利不止。必協熱而便膿血也。

此疫邪之分傳者。病無表裏證。邪在募原。此指初起而言。脈數者。熱盛於內也。浮者。熱蒸於外也。發熱七八日。而不從汗解。其內熱已深。故曰可下。此指見在而言。假令已下。是指下後言也。若下後。脈數不解。熱傳於陽。則消穀善飢。爲衛氣前通也。熱傳於陰。必傷血成瘀。爲營氣前通也。宜抵當湯。卽下如豚肝之類。若脈數不解。而下利。便膿血者。已成脾氣孤絕。五液注下。爲不治之證也。勿作尋常協熱利看。

病在陽。應以汗解之。反以冷水瀉之。若灌之。其熱被卻。不得去。彌更益煩。肉上粟起。意欲飲水。反不渴者。服文蛤散。

十九楊云此條溫熱俱有之不獨疫病若不瘥者與五苓散二十寒實結胸

無熱證者與三物小陷胸湯二十一白散二十二亦可服

此疫邪之傳表者卻字疑是劫字之誤徐亞枝云卻不得前也熱被冷

抑不得外出轉而內攻故彌更益煩卻字似非誤楊云是文蛤散當屬文蛤湯二十病

在陽者謂疫邪已傳陽分也傳於陽當從汗解濕噴也

灌漑也疫邪熱極原可飲冷水得大汗而解者乃以之

濕灌皮毛內熱被冷水外劫故內煩益甚肉上粟起也

欲飲而不渴者內熱爲外水所制也文蛤性寒氣燥合

之麻杏石甘去外水而清內熱五苓散亦具利水徹熱

之功小陷胸湯及亦可服七字疑衍

傷寒。噦而腹滿。視其前後。知何部不利。利之則愈。

此疫邪之傳裏者噦。在傷寒多寒。在疫證爲熱。況見有腹滿。前後不利可據。其爲邪氣壅蔽無疑。前後二便也。利二便。卽疏裏法也。

得病六七日。脈遲浮弱。惡風寒。手足溫。醫二三下之。不能食。而脇下滿痛。面目及身黃。頸項強。小便難者。與柴胡湯。後必下重。本渴而飲水嘔者。柴胡湯不中與也。食穀者噦。此疫邪之越於三陽者。得病六七日。惡風寒。而脈浮弱。非表虛也。手足溫。而脈遲。非裏寒也。合之爲疫邪。內伏不潰之證。醫者重於疏裏。乃二三下之。不能食。小便難。

不無傷中。而脇下滿痛。少陽也。面目及身黃。陽明也。頸項強。太陽也。邪已越於三陽。斯時但於清解熱毒劑中。按經據證。略加引經達表之藥。足矣。若拘於脇痛爲少陽。與柴胡湯。參甘薑棗。錮蔽疫邪。必下重作利也。若先渴後嘔。爲水飲內停。非少陽喜嘔。柴胡湯必不可與。食穀者噦。亦屬邪蔽使然。非內寒也。末句之義。似有脫簡。太陽病未解。脈陰陽俱停。先必振慄汗出而解。但陽脈微者。先汗出而解。但陰脈微者。下之而解。若欲下之。宜調胃

承氣湯。

二十四

此疫邪之越於太陽者。太陽病不解。係疫邪浮越。非太

陽經病也。停勻也。脈陰陽俱停。是尺寸浮沈遲速大小同等也。其正氣有權。足以化邪。故從汗解。振慄者。戰汗也。脈微。謂邪氣衰也。陽邪先退。先從汗解。陰邪先退。先從下解。汗法不一。而下法宜調胃承氣。以疫邪雖熱。不必盡實也。

太陽病。下之而不愈。因復發汗。以此表裏俱虛。其人因致冒。冒家汗出自愈。所以然者。汗出表和故也。得裏未和。然後下之。

此言疫邪傳表。先下後汗之誤。疫邪達表。當從汗解。乃拘於疏裏而先下之。徒虛其裏。故不愈。因復發汗。是又

虛其表。故汗出而作冒也。必俟表氣已和。再和裏氣。疫證汗後。往往有宜下者。有下後必汗出而始解者。總由邪氣分傳。而無一定之治法也。

太陽病。下之。其脈促。不結胸者。此爲欲解也。脈浮者。必結胸也。脈緊者。必咽痛。脈弦者。必兩脇拘急。脈細數者。頭痛未止。脈沈緊者。必欲嘔。脈沈滑者。協熱利。脈浮滑者。必下血。

此言疫邪。誤下之變。治疫雖宜疏裏。但旣越於太陽。自當從表。一誤下之。其變有不可勝言者。促爲陽盛。下之必致結胸。不結者。陽邪外散也。爲欲解。浮爲在表。下之

則內陷爲結胸。緊爲邪實。下之則邪上浮。爲咽痛。弦者
挾風。下之則引風入肝。故兩脇拘急。細數者。熱鬱於內
也。下之則邪火上衝。故頭痛未止。沈緊多飲。下之必動
其飲。故欲嘔。沈滑者。熱爲溼滯也。下之則溼熱下流。故
協熱利。浮滑者。熱盛於表也。下之則熱邪內攻。故下血。
陽毒之爲病。面赤斑斑如錦紋。咽喉痛。唾膿血。五日可治。
七日不可治。升麻髓甲湯二十五主之。

陽毒者。疫邪犯於陽分也。陽邪上壅。故面赤。熱極傷血。
故徧體斑斑如錦紋也。咽喉痛。唾膿血。皆邪熱鑠津。有
立時腐敗之勢。五日經氣未周。毒猶未徧。故可治。七日

則邪氣徧而正氣消矣。故曰不可治。方用升麻鼈甲者。所以解陽分之毒。卽所以救陰分之血也。

陰毒之爲病。面目青。身痛如被杖。咽喉痛。五日可治。七日不可治。升麻鼈甲湯。去雄黃。蜀椒。主之。

陰毒者。疫邪入於陰分也。陰中於邪。故面目青。邪閉經絡。故身痛如被杖。咽喉痛者。陰分熱毒上壅也。故其日數與陽經同。而治法原方去雄黃蜀椒者。陰分已受熱邪。不堪再用熱藥也。

雄按。王安道云。陰者非陰寒之病。乃感天地惡毒異氣。入於陰經。故曰陰毒耳。後人謂陰寒極盛。稱爲陰毒。引

仲景所敘。面目青。身痛如被杖。咽喉痛數語。卻用附子散。正陽散等藥。竊謂陰寒極盛之證。固可名爲陰毒。然終非仲景所以立名之本意。後人所敘陰毒。與仲景所敘陰毒。自是兩般。豈可混論。蓋後人所敘陰毒。是內傷生冷。或暴寒所中。或過服寒涼藥。或內外俱傷於寒。而成。非天地惡毒異氣所中也。又趙養葵云。此陰陽二毒。是感天地疫癘非常之氣。沿家傳染。所謂時疫也。

又按雄黃蜀椒二物。用治陽毒。解者謂毒邪在陽分。以陽從陽。欲其速散也。余謂雄黃尙屬解毒之品。用之治毒。理或有之。至蜀椒。豈面赤發斑。咽痛唾血。所可試乎。

必有錯簡。未可曲爲之說也。楊云。通人之論傷寒論中。此類甚多。俱不必強作解也。

又按倪沖之傷寒彙言。附載袁雲龍云。仲景之書。前敘六經諸條。其中文義。前後起止。多有闕失。歷代醫哲。並未深勘。至於陽毒陰毒二條。更可詫異。俱用升麻鼈甲湯。陰毒但無雄黃。蜀椒。此坊刻之譌本也。宋龐安常。陰毒陽毒。概用全方。陰毒不去椒黃。於理稍近。余於萬歷乙亥。得南陽舊本。其陰毒條。於去雄黃下。作倍蜀椒加半主之。於理爲是。蓋陽毒陰毒二證。良由平素將息失宜。耗疲精髓。逆亂氣血。所以猝受山林水澤。瘴厲惡氣。

所中感而成疾。余當壯年。北遊燕邸。以及遼陽之外。南遊閩廣黔甸。以及交趾之區。大抵南方多陽毒。北方多陰毒。時醫按法施治。曾無一驗。中州等處。有人患此。亦罕能救。細按二證。俱有咽喉痛三字。以余竊論瘍科書。有鎖喉風。纏喉風。鐵蛾纏。三證。其狀相似。有面色赤如斑者。有面色青而悽慘者。有吐膿血者。有身痛如被杖者。有氣喘急促者。有發譫語煩亂者。雖有兼證如此。總以咽喉閉痛爲苦。猝發之間。三五日可治。至七日不減。卽無生理。豈非陽毒陰毒。二證之類乎。再察其脈。緩大者生。細數緊促者死。余見此二證。不論陽毒陰毒。概用

喉科方。以蓬砂二錢。火硝六分。米醋一瓊。薑汁小半瓊。用鷲翎探入喉中。吐痰涎許。活者百數。據袁公之論。則陽毒爲陽邪。陰毒爲陰邪矣。陰邪固宜倍蜀椒之半。而以蜀椒施之陽邪。終嫌未妥。改從喉科法。引吐却穩當。以余度之。陽毒卽後世之爛喉痧耳。叔和謂之溫毒是已。治法忌用溫散。宜用清化。陳繼宣疫痧草專論此證。論曰。百合病者。百脈一宗。悉致其病也。意欲食。復不能食。常默然。欲臥。不能臥。欲行。不能行。飲食或有美時。或有不。用。得藥。則劇吐利。如有神靈者。身形如和。其脈微數。每溺時。頭痛者。六十日乃愈。若溺時。頭不痛。淅淅然者。四十日

愈。若溺快然。但頭眩者。二十日愈。其證。或未病而預見。或病四五日而出。或二十日。或一月微見者。各隨證治之。楊金匱中論此證最爲明顯完善

百合病者。皆緣時疫新愈。其三焦腠理。榮衛之交。餘熱未清。正氣困乏。不能流暢。如人在雲霧之中。倏清倏渾。如日月被蝕之後。或明或暗。故有種種不可名言之狀。而其口苦。小便赤。脈微數。乃餘熱的證也。病不在經絡臟腑。楊云此句欠酌治不能補瀉溫涼。惟以清氣爲主。氣歸於肺。而肺朝百脈。一宗者。統宗於一。卽悉致其病之謂也。溺時。頭痛者。小便由於氣化。水去則火上衝也。其病爲

重六十日愈。月再周而陰必復也。溺時淅淅然者。膀胱腑氣一空。表氣亦因之而失護也。但頭眩者。陽氣不能上達也。熱漸衰。病漸輕。故愈日漸速也。曰其證。指溺時頭痛諸證而言。曰未病預見。謂未成百合病。先見頭痛等證也。百合清熱養陰。專潤肺氣。治以百合。卽以百合名病也。

雄按。此病仲景以百合主治。卽以百合名其病。其實餘熱逗留肺經之證。凡溫暑溼熱諸病後。皆有之。不必疫也。肺主魄。魄不安。則如有神靈。肺失肅清。則小便赤。百合功專清肺。故以爲君也。

楊云。前注已平正通達。讀此更親切。不易覺。前注尙隔一

層余嘗謂孟英學識前無古人試取其所以注與古人所注較論之當知余言之非阿所好也憶辛丑

暮春于役蘭溪在嚴州舟次見一女子患此證其父母

以爲祟也余詢其起於時證之後察其脈數第百合無

覓處遂以葦莖麥冬絲瓜子冬瓜皮知母爲方汪按百

肺之品從此悟入可謂服之一劑知二劑已

在人意中出人意外矣

服之一劑知二劑已

百合病見于陰者以陽法救之見于陽者以陰法救之見陽攻陰復發其汗此爲逆見陰攻陽乃復下之此亦爲逆此推究致百合病之源見於陰者卽陰中於邪也陰既受邪不卽與陽氣通調則陰邪愈閉法當攻陽以救其陰也見於陽者卽陽中於邪也陽既受邪不卽與陰氣

通調。則陽邪不化。法當攻陰。以救其陽也。若不攻陰。救陽。復發其汗。是爲見陽攻陽。不知攻陽救陰。復下之。是爲見陰攻陰。二者均之爲逆。皆因治不如法。陰陽未能透解。所以致有百合之病。若於百合病中。並無汗下之證。毋用汗下之法也。下之汗吐下。皆此意。此處陰陽二字。但就營衛講。不說到氣血臟腑上。

百合病。發汗後者。百合知母湯六十二主之。

得之汗後者。其陽分之津液必傷。餘熱留連而不去。和陽必以陰。百合同知母。泉水。以清其餘熱。而陽邪自化也。○按初病邪重。故上節言救言攻。此病後餘邪。當用

和法。

百合病吐之後者。百合雞子黃湯二十主之。

其得之吐後者。吐從上逆。較發汗更傷元氣。陰火得以上乘。清竅爲之蒙蔽矣。故以雞子黃之純陰養血者。佐百合以調和心肺。是亦用陰和陽矣。

百合病下之後者。百合滑石代赭湯二十主之。

其得之於下後者。下多傷陰。陰虛則陽往乘之。所以有下焦之熱象。百合湯內加滑石代赭。取其鎮逆利竅。以通陽也。是謂用陽和陰法。

百合病不經吐下發汗。病形如初者。百合地黃湯二十主之。

之。

不經吐下發汗。正雖未傷。而邪熱之襲於陰陽者。未必透解。所以致有百合病之變也。病形如初。指百合病。首節而言。地黃取汁。下血分之瘀熱。故云。大便當如漆。非取其補也。百合以清氣分之餘熱。爲陰陽和解法。

百合病。一月不解。變成渴者。百合洗方主之。

百合病。至一月不解。纏綿日久。變成渴者。津液消耗。求水以自滋也。渴而不致下消。病猶在肺。肺主皮毛。故以百合湯洗之。使毛脈合行。精氣於腑也。食煮餅。假麥氣以助津液。勿以鹽豉。恐奪津增渴也。

百合病。渴不差者。栝婁牡蠣散

三十主之

楊云此條證。比上條較重。

雄按。尤在涇曰。病變成渴。與百合洗方。而不瘥者。熱盛而津液傷也。栝婁根。苦寒生津止渴。牡蠣鹹寒。引熱下行。不使上鑠也。此注已極該括。陳注較遜。故從尤本。

百合病。變發熱者。百合滑石散

十二主之

變發熱者。餘邪鬱久。淫於肌表。熱歸陽分也。百合清金退熱。加滑石以利竅通陽。曰當微利。指小便利言。謂熱從小便去也。

狐蜚之爲病。狀如傷寒。默默欲眠。目不得閉。臥起不得安。蝕于喉。爲蜚。蝕于陰。爲狐。不欲飲食。惡聞食臭也。其面目。

乍赤。乍黑。乍白。蝕于上部。則聲嘎。甘草瀉心湯三十主之。
蝕于下部。則咽乾。苦參湯洗之。蝕于肛者。雄黃熏之。

百合病。是餘熱留連於氣機者。狐蜚病。是餘毒停積於
幽陰者。狐蜚。水蟲也。原疫邪。不外溼熱。久留不散。積而
生蟲。顧聽泉云。疫邪久留。人不活矣。久留上宜加餘邪二字。喉與二陰。爲津液溼

潤之處。故蟲生於此也。聲嘎。因知其蝕於喉。咽乾。而知
其蝕於陰者。因其熱鬱於下。津液不能上升也。餘熱內
鬱。故狀似傷寒。內熱。故默默欲眠。內煩。故目不得閉。臥
起不安。面目乍赤。乍黑。乍白。以熱邪隱見不常。非蟲動
也。苦參。雄黃。皆燥溼殺蟲之品。甘草瀉心。不特使中氣

運而溼熱自化。抑亦苦辛雜用。足勝殺蟲之任也。略參尤氏

病者。脈數。無熱。微煩。默默但欲臥。汗出。初得之。三四日。目赤如鳩眼。七八日。目四眥黑。若能食。膿已成。赤豆當歸散。

三十一主之。

此疫邪熱毒。蘊伏於內也。故有脈數。身不熱。微煩欲臥之證。初得之。汗出。表氣尚通也。至三四日。目赤如鳩眼。熱傷血分也。七八日。目四眥黑。血已腐敗也。能食者。病不在胸腹。膿成於下也。赤小豆。清熱去溼。兼以解毒。當歸。和血化膿。使毒從下解也。

先輩喻嘉言。將辨脈篇中。清邪中上焦。濁邪中下焦。一

節爲仲景論疫根據。可謂獨具隻眼者矣。其治法以逐
穢爲第一義。上焦如霧。升而逐之。兼以解毒。中焦如瀼。
疏而逐之。兼以解毒。下焦如瀼。決而逐之。兼以解毒。此
論識超千古。雄按林北海亦云。喻氏論疫。蓋仲景於吐
利霍亂等。不過感一時冷熱之氣者。猶且論及。而謂疫
病之爲流行大毒者。反不之及耶。然則傷寒論中之必
有疫證。是非臆說。坤學識淺陋。不敢妄自搜羅。擾亂經
旨。但將傷寒金匱中證治。與風寒等法不合。寓有毒意
者。均歸之疫。雄按守真論溫。鳳達論暑。又可論疫。
立言雖似創闢。皆在仲景範圍內也。
楊按。此篇搜輯甚佳。俱古人所未及。然原論不可解處

甚多。其用方與病不相登對處。亦有之。讀者師其意而
於其不可解者。勿强事穿鑿。則善矣。汪按此評大妙如此方不爲昔人所
愚所謂盡信書不如無書也

溫熱經緯卷二